


4

CHINESE-JAPANESE COLLECTION
HARVARD COLLEGE LIBRARY
FROM HARVARD-YENCHING INSTITUTE

JUN 28 1932

6 h h 3210/763.81

重刊臨海縣志



臨海縣志卷之八

哈佛大學
哈佛燕京
圖書館
珍藏印

候補按察使司僉事邑人洪若臯編輯

同邑人舉貢庠生分纂

人物志二

宦業傳

宋陳騃字叔進紹興二十四年試春官第一時秦檜

當國以秦垧加其上累官將作少監守秘書少監

兼太子諭德太子尹臨安公謂儲宮下親細務不

得專致于學非所以毓德也太子矍然亟辭崔淵

臣等集卷一
卷一
以外戚張詠進除秘書郎兼金部郎公封還詞頭
未幾出知贛州改秀州召還首言陛下銳意圖治
羣下急于自媒爭獻彊兵理財之計及昇以職報
効蔑聞宜杜邪諂之路再復原職遷秘書監兼崇
政殿說書淳熙五年試中書舍人兼侍講同修國
史上欲採晉宋以下興亡理亂之大端約爲一書
謂公與周必大可任言者忌而攻之上留章不下
援提舉太平興國宮改知袁州光宗受禪召試吏
部侍郎紹熙元年同知貢舉兼侍講應詔陳時政

三十條如宮闈之分不嚴則權柄移內謁之漸不
杜則明斷息謀臺諫于當路則私黨植咨將帥于
近習則賄賂行不求讜論則過失彰不謹舊章則
取舍錯宴飲不時則精神昏賜予無節則財用竭
皆切於時病三年權禮部尚書同知樞密院事四
年參知政事光宗以疾不朝重華宮會慶節稱壽
又不果往公三入奏廷臣上疏者以百計上感悟
以冬至日朝重華五年正月朔旦稱壽于慈福宮
孝宗崩光宗以疾未臨喪公請正儲位以安人心

臨海縣志 卷六 二
七日攝行三省事甯宗卽位知樞密院事兼參知政事趙汝愚爲右相公素與汝愚不協未嘗同堂語汝愚擬除劉光祖侍御史公奏曰光祖舊與臣有隙光祖入臺臣請避之汝愚愕而止時韓侂胄特傳言之勞潛竊國柄吏部侍郎彭龜年論侂胄將爲國患不報於是龜年侂胄俱請祠公曰以閤門去經筵何以示天下龜年竟外補侂胄語人曰彭侍郎不貪好官固也元樞亦欲爲好人耶遂以資政殿大學士與郡辭詔提舉洞霄宮慶元二年

知婺州告老授觀文殿學士卒年七十六贈少傅謚文簡有文集行于世見宋史列傳今祀鄉賢

謝深甫字子肅少穎悟刻志爲學積數年不寐夕則置餅水加足於上以警困怠父景之識爲遠器臨終語其母曰是兒當大吾門善訓迪之母攻苦守志督公力學中乾道二年進士第調嵎縣尉歲饑有死道旁者一嫗哭訴曰吾兒也傭于某家遭掠而斃公疑焉徐廉得嫗子他所召嫗出示之嫗驚伏曰某與某有隙賂我使誣告耳越帥方滋錢端

禮皆薦公有廊廟才調崑山丞爲浙曹考官一時
士望皆在選中司業鄭伯熊曰文士世不乏求具
眼如深甫者實鮮公曰文章有氣骨如泰山喬嶽
可望而知以是得之知處州青田縣侍御史葛邲
監察御史顏師魯禮部侍郎王藺交薦之孝宗召
見公言今人才枵中侈外者多妄誕矯訐沽名者
多眩鬻激昂者急於披露而或鄰於好夸剛介者
果於植立而或鄰於太銳靜退簡默者寡有所合
或鄰於立異故言未及酬而已齟齬事未及成而

已挫抑於是趣時徇利之人專務身謀習爲軟熟
畏避束手因循苟且年除歲遷亦至通顯一有緩
急莫堪倚仗臣願任使之際必察其實旣悉其實
則涵養之以蓄其才振作之以厲其氣栽培封殖
勿使沮傷上嘉納問當世人才對曰薦士大臣職
也小臣來自遠方不足以奉明詔上是之論宰臣
曰謝深甫奏對雍容有古人風除籍田令遷大理
丞江東大旱擢爲提舉常平講行救荒條目所全
活一百六十餘萬人光宗卽位以左曹郎官借禮

部尚書爲賀全國生辰使紹熙改元除右正言遷起居郎兼權給事中知閣門事韓侂胄破格轉遷郡刺史公封還內降云人主以爵祿磨厲天下之人才固可重而不可輕以法令隄防天下之僥倖尤可守而不可易今侂胄驀越五官而轉遷郡僥倖一啟攀援踵至將何以拒之請罷其命進士俞古應詔言事語涉詆訐送瑞州聽讀公謂以天變求言未聞旌賞而反罪之則是名求而實拒也俞古不足以道所惜者朝廷事體耳右司諫鄧駟論

近習左遷公請還駟謂不可以近習故變易諫官爲清朝累二年知臨安府三年除工部侍郎入謝光宗面諭曰京尹寬則廢法猛則厲民獨卿爲政得寬猛之中進兼吏部侍郎兼詳定勅令官四年兼給事中陳源久以罪斥忽予內祠公固執不可姜特立復詔用公力爭特立竟不得入張子仁除節度使公疏十七上命遂寢每禁庭燕私左右有希恩澤者上必曰恐謝給事有不可耳甯宗卽位除煥章閣待制知建康府改御史中丞兼侍讀上

言此年以來紀綱不立臺諫有所論擊不與被論
同罷則反除以外任給舍有所繳駁不命次官書
行則反遷以他官監司有所按察不兩置之勿問
則被按者反得美除以奔競得志者不復知有廉
耻以請屬獲利者不復知有彛憲貪墨縱橫莫敢
誰何罪惡暴露無所忌憚墮壞紀綱莫此爲甚請
風厲在位革心易慮以肅朝廷禮官議祧僖祖侍
講朱熹以爲不可公言宗廟重事未宜遽革朱熹
攷訂有據宜從熹議慶元元年除端明殿學士簽

書樞密院事遷非知政事再遷知樞密院事兼參
知政事內侍王德謙建節公三疏力陳不可蹈大
觀覆轍德謙竟斥進金紫光祿大夫拜右丞相封
申國公光宗山陵爲總護使還拜少保力辭改封
岐國公嘉泰元年累疏乞避位甯宗曰卿能爲朕
守法度惜名器不可以言去召坐賜茶御筆書說
命中篇及金幣以賜之有余熹者上書乞斬朱熹
絕僞學且指蔡元定爲僞黨公擲其書語同列曰
朱元晦蔡季通不過自相與講明其學耳果有何

罪乎余嘉蟣蝨臣乃敢狂妄如此當相與奏知行
遣以厲其餘金使入見不如式甯宗起入禁中公
端立不動命金使俟于殿隅帝再御殿乃引使者
進書迄如舊儀拜少保乞骸骨授醴泉觀使明年
拜少傅致仕有星隕于居第遂薨後孫女爲理宗
后追封信王改封衛魯謚惠正傳見宋史祀鄉賢
贊曰陳文簡忠悃讜言率先朝士能使二帝全
至恩而定大寶謝惠正受知三君其所建白類
關大倫禪國體雖古之名臣何以加諸惜其好

惡見譏於國史叔進以詆譏呂祖謙至與趙汝
愚劉光祖爲讐子肅與韓侂胄同輔政而不言
黨禁之惡且一劾陳傅良再劾汝愚薰蕕不同
器觀人必觀其所與處君子曷可不慎乎

王術字彝仲紹興二十七年進士除婺州推官孝宗
立賜兵士錢州無見緒未給守方宴賓卒術幕直
上維坐妄語公聞之亟入卒望見卽招其下曰節
推來俯身下氣如平日且愬曰侍郎犒賞遲又欲
折支公笑曰汝誤矣自渡江以來將近四十年兵

火散落今攢檢方畢何得爲遲錢已在庫何名爲折卒稍退公白守借于他司俄又報兵士毆庫吏將死公怒叱曰汝不聽名次而亂取必斬無赦卒意折始散去嗣擢秘書省正字兼聖政檢討遷秘書郎典省試四方士試于貢院晨門未啟競棘叢中適忌日行香親王不得前取別巷過聞于上及見上曰聞無賴者亦來耶公曰誠然萬人之聚固無不有然異日爲陛下棟梁者皆是也上意解既批公上殿改官公曰近日特旨上殿改秩雖由權

道實啟倖門非祖宗法也遂草劄辭不就居貧尤勵節操嘗贖質而得金趨家人還之卒年六十一鹿何字伯可紹興庚辰進士清風介節淡於進取朱文公雅重之歷金部郎中年五十一乞致仕孝宗嘉其恬退晉朝奉郎直秘閣官一子以華其歸賜號見一先生親揮宸翰賜之有云見一先生榮歸故鄉遇府州縣如朕親行以是繕部給以龍亭載之而先導經過鄉邦守令朝服郊迎如禮公歸家於白築終不復出卒後郡守丁璫以公與石密商

飛卿陳耆卿併郭磊卿杜範爲六賢立祠祀之今
祀鄉賢

周洎字子及乾道丙戌進士授新昌縣尉辟淮西總
領所酒官瀆熙戊戌中博學宏詞差江東憲司幹
官除太學正初王抃起吏胥預密議嗜利之徒因
緣請托所薦用者附和勢傾朝廷人未敢詰公見
上具論其奸累數千萬言且曰陛下欲開言路進
人才脩政事今小人在側回護蔽隔陛下盛德豈
堪以此輩負謫上大悟曰朕始于卿聞此言公立

朝侃侃直言大臣貴近側目視之公不自安求外
補俄以憂去除國子監主簿是侍北朝再通和二
十年矣一日聘使不至中外罔測公建言近來日
中黑氣陽明眊昏當春祁寒霧雪彌月天象示戒
甚矣陛下宜脩德警備因列八事曰選將帥擇軍
士遣間諜議城守備戰艦儲糧食節財用委謀臣
復累數千言指畫如見上諭樞密使曰周洎日知
邊事今士大夫不及也尋詔試館職忽得暴疾終
所著有奏議集子成子棫登嘉定進士

應武字緯之清熙十四年進士時周必大知貢舉公對策言大臣期於盡忠不期於尚同深合其意擢上第衣和州教授調高郵歷知湘鄉縣嘉定中陞工部員外郎時誅韓侂胄蘓師旦以其首畀金人難其使丞相錢象祖以公充賀正旦使至金抗禮不屈金人嘉嘆歸朝甯宗書不辱君命四字賜之陞右正言殿中侍御史右諫議大夫先是金兵陷安豐公勸守將何汝礪姚公佐屯八疊灘以拒之諸將不從師竟敗績人服其識以疾致仕卒贈正

議大夫祀鄉賢祠子塾平江通判屋知容州基四
川統領

贊曰王彝仲清節自持遇事果敢周子及立朝侃侃知無不言皆憂時愛國之士也應緯之銜命於倥偬之時抗禮敵庭不辱君命可謂難焉鹿伯可解組投簪寵及林泉幾追榮疏廣矣

元周仔肩字本道宋太學生理學名儒敬孫仲子以春秋登延祐五年進士文學名重當時初授鄞縣丞遇事立斷剖決如流時徭役繁興公爲立義役

以便民轉長與判官剔蠹辨冤恤災賑困百姓感德為立生祠終奉議大夫惠州路總管州判

贊曰本道為子高之子本心之弟理學庭授道非偶然觀其化民善俗隨地而施類非俗吏之所能為也孔子曰道之以德齊之以禮非本自學問而能然耶

明陶凱字中立生時有大星墜簷前成童讀書輒過目成誦性持重不妄言咲里中常大疫公入一病家探視病者見疫神避入甕器中藏之公命筆封

識令人投棄水中疫即愈又一日入城晚宿三江值病家請祝者祈禱公曰我當代為禱迺誦離騷經其聲清越以長病者驚汗浹背遂愈幼時遊吳興遇相者四明袁廷玉曰公五岳朝挹而氣色未開五星分明而光澤未見宜藏器待時後十年當為異代臣子顯名在荆揚之間元末以明經教授杭州明太祖起兵聞名訪見延上座公曰將軍器宇軒昂襟懷豁達凱閱人多誠兒所未見者因進望空取天下之策謂羣雄所據地是實地兵強未

可與敵元人雖有地政衰民怨是空地也取之易
且曰方今百姓愁苦仰在明主請將軍自愛太祖
大奇之自後用其策遂至地廣兵強以至有天下
戊申定鼎金陵遂遣使奉書幣徵見授翰林院編
脩洪武二年與學士宋濂等纂脩元史又撰大明
集禮命教大本堂授楚玉經三年陞禮部尚書剖
符封功臣議五等封爵宿大本堂據歷代故實討
論詳定四裔之未歸附草璽書論之悉效順獻琛
又制鄉飲酒禮定科舉式撰大明樂章九闕四年

初舉會試公爲提調官取中進士吳伯宗等一百
三十名程文公序其首嘗請選人專任東宮官罷
兼領職太祖曰朕以廷臣有才望勲德兼領東宮
官非無意也嘗患廷臣與東宮官有不相能遂成
嫌隙離間骨肉其禍非細今令省臺官兼東宮
輔導之職父子一體君臣一心庶幾無相構之患
是年長至日太祖御奉天殿出宿齋宮尚書黃肅
等待公曰皇帝升中於天國之大典幸際熙明與
於執事之列不可無篇什以昭示萬世遂以唐詩

星臨萬戶動月榜九霄多爲韻公首唱餘以次屬
和太祖大悅命翰林學士宋濂序其首五年言漢
唐宋時皆有會要紀載時政及起居注紀言動宜
令臺省府各置銅櫃簿錄聖旨及時政依會要編
類爲書使後之議事者有所考從之一日獨召公
對文華殿賜繡墩忽太祖色愀然公請乃得高后
艱產之由公因進以方晡時喜捷變至太祖大悅
賜之金牌篆云免陶卿之罪又嘗陪侍便殿太祖
從容問公所居地形勢公以象鼻巖對且曰臣鄉

人張俞仲題曰曾入蒼舒萬斛舟至今鼻準蘸清
流君王玉輅催行駕安得身閑伴白鷗卽令人歸
刻其詩於水中九靈巖壁以實明問一日太祖御
五鳳樓工部進吞舟之伎羣臣侍觀皆以見吞對
公獨見透船走耳太祖因疑之復夢龍遶于公所
居門遂快然不樂尋出爲湖廣行省參政致仕八
年復召爲國子祭酒復致仕自號耐久道人上聞
之怒曰何自賤也會使高麗王客誤用符驗遂坐
與知罪雖向有金牌免罪之旨亦不自表也翌日

傷悼之贈太子少保以旌其忠所著有陶尚書集
今祀鄉賢祠

葉見泰字彝仲號蘭莊惠仲之兄少有文名明師取
台州公衣褐造軍門謁其帥語三日夜不休署部
從事因從王師下永嘉取福建收兩廣皆公參謀
之力未幾使安南論其君長來貢以功授高唐州
判官轉睢甯令以薦陞刑部主事方遜志嘗與公
書曰某童時侍先人左右輒聞執事名後四年先
人守魯執事有手筆至先人教某曰吾郡之士未

有過者也某已私識之又四年來金華執事自睢
甯回始獲拜於翰林太史公館下執事於某溫溫
乎其容甚與其進也屬屬乎其言深望其成也退
則又爲書告先人曰他日顯吾郡者必此子也有
子如此何以憂爲先人不及聞斯言而卒此書尙
在某每展卷一視輒涕泣不自勝云公年五十卒
於官方先生復祭之以文言甚悽惻所著有蘭莊
集

賀銀字彥白洪武庚午薦於鄉任桃源教諭陞宛平

知縣有能聲永樂初擢通政司參議進工部侍郎
時台民詹住妖言倡禍誣奏鄉人聚叛廷議遣師
征討公驚愕極力辨爭不得請囚妻子爲信乃奉
勅卽命公提兵按台相機勦撫公至會父老宣布
朝廷德意飭軍士無騷擾招撫逋逃察訪善惡止
罪聚衆仇殺者數人閩郡賴以全活卒贈工部尚
書郡守許繼奏請立祠祀之今祀鄉賢

童孟韜字文熙永樂十九年進士授工部主事嘗以
纂修事歷婺源朱文公八代孫湛來謁語及徽閩

宗派睽隔莫知盛衰婺源止一戶田二頃餘輸租
役與編氓伍公嘆曰朱子功在萬世可使其子姓
若凡民耶遂爲疏請特賜蠲免復授五經博士一
員湛與族人懷其義廢食家祠陞長蘆鹽運同知
以廉介著聲迄歸囊無遺貲尤爲邦人所重云

贊曰陶中立著述宏多輔翊皇猷其稽古禮文
之事宋太史景濂而下不多見卒以疑忌勿克
善終甚矣明太祖之不宏也葉彝仲褐衣談世
務有古賢捫虱之風而見推於方濟甯復能識

正學於髫齡之歲難矣賀彥白處危疑而捍大
患德加梓里厥績茂焉童文熙推恩大賢之裔
有功於道學者不淺均吾邑之卓然有立者哉
陳員韜字從周號勿齋自幼穎異受業陳逸菴先生
之門登宣德庚戌進士授江西新城令剔蠹吏核
詭匿之籍賦役以平毀淫祠二十餘所奏請清廢
寺田據于豪右者七千餘畝以給貧民聽訟明決
人不敢欺隣邑有不平者多求直焉逃亡者聞風
復故業先是新城充力士者十餘人例止其身後

調守普安王將利爲已役勾擾及其子孫公奏其
事與他郡獲免者六百餘家既而藩憲交薦宜守
一郡當道以非九載例格不行改知永新邑素劇
訟公至痛絕其尤者奸民猾胥畏威遠遁甫兩月
禮部聘典壬戌會試文衡竣事擢監察御史正色
直言不避權貴風裁凜凜甲子巡按四川黜貪酷
獎廉能辨釋諸司死獄四十餘人維州大小姓徭
種世讐殺爲患公諭以禍福不煩一兵皆悅服遵
法令丁外艱復任戊辰福建沙縣尤溪盜起特簡

公鎮撫其民王師至建甯賊勢張甚王將惟日坐城中燕飲有司乘風征求甚急公至正有司罪狀遂自擁數十騎直下延平議戰守人心始安後甯陽侯大舉而下兵威所加將盡殲之公參決其間全活脅從者二萬七千餘家平反疑獄得不死者五十餘人陞廣東左參政未幾後轉福建右布政使時豪僧恃宦者僭民田官不敢問公下車卽繩以法不少貸壬申漳州海寇竊發公與帥憲二司往擊尋遘疾不起終于閩年僅五十有四靈輻所

過士民莫不洒涕居官二十餘年囊無贏資今崇祀鄉賢子選見理學傳

侯潤字仲璣號省菴自幼與陳勿齋齊名同薦于鄉登宣德八年進士擢禮科給事中敷對糾駁有聲從弟臣同榜進士任刑科給事中正統己未元旦聯班朝賀當時榮之己丑校文禮闈首取商公輅人服其明陞通政使參議忤權宦王振落職佐鳳陽行間復劾振罪尋改知和州嚴明廉幹訟減盜息民安其化及振敗議將柄用聘司順天鄉試檄

至適以疾卒平生尤篤孝友嘗祈減年壽母讓業以厚同氣所著有詩書啟蒙省菴等稿今祀鄉賢陳旅字正初號敬齋遜之子性峭直以明經任新淦縣訓導嚴毅端方士心悅服脩治學宮規益縣政擢翰林院孔目改國子學錄操履如一遷監丞丞職雖卑而權則重監之紀綱自祭酒而下得參預焉公清剔宿弊監規肅然堂官爲之改容相待轉南京國子監丞六館之士素聞其清正望而畏之曰陳監丞來矣未幾署堂印奏請脩飭廟學盡出

羨餘以資公費一無所私輸粟生與外國遣子入學者例皆厚贄一無所受寮友生徒有孤貧患難者則傾橐周給之無吝色九載秩滿卽乞休諸生叩登聞挽留不待報飄然東歸居家十餘載卒年八十有一今祀鄉賢

葉廷榮字尚本池州守恩之子嗣承家學嗜古不倦景泰丙子薦於鄉成化丙戌登進士歷任監察御史彈射有聲一塵不緇恬於進取迄在告家徒壁立至不能支疾且革當道欲因事周之家人慫慂

竟不從聞者咸稱其垂死不以一言博千金守約之義足以範俗如此

余鏐字懋器號困學性介直天順壬午薦於鄉成化乙未登進士授崑山令推誠撫字爲政舉大要崇學校懲豪右黜滑胥恤鰥寡民甚德之邑瀕江多水患設法疏築事不勞而集擢監察御史去之日行橐蕭然入臺不避權要嘗奏罷傅奉杜倖進崇正闢邪等疏爲縉紳所重奉勅巡廣右地逼彝獠多瘴毒按部之日父老遮道請勿遍歷公慨然曰

吾不忍避上瘴之自病而坐視人瘴之病民也因出瘴說以遺之所至安撫流亡招徠狼兵多爲效用梧柳諸寨歛跡地方賴以救甯事竣還京以疾卒於途年四十有九崑山祀於名宦載崑志謂其寬厚簡重肯爲民任咎今祀鄉賢

郭紕字仲端成化辛卯鄉薦辛丑成進士令績溪以廉幹聞擢監察御史風裁清峻正德己巳以山東參政管順德事尋改安慶府介潔廉能之聲達於上下迄致政歸行李蕭然安慶志稱其去日之行

囊減於其來歸家杜門如寒士日用極儉約僮僕不能堪或有逸去者時人歌之曰郊外兒童迎屋裏兒童走廉愛自有真古今郭太守其清節見推於梓里如此子禱登正德進士今祀鄉賢

林元弼字典卿號益菴與弟元倫同薦正德庚午鄉試嘉靖初知解州殫心振刷每集耆老問民疾苦藩邸草場軍校殺人匿其屍以計獲之卒置於法廣慈寺僧殺人於井發伏正其辜改寺爲解梁書院以其餘地立社學集鄉髦士日與之講明理道

解人翕然奮興諸所規爲類如此年四十九卒於官時太史呂相謫倅於解爲治其喪笥中所遺衣帶故書外僅俸金四十兩而已白於上司俾治屬賻贈以助歸櫬其清潔尤人所難及云

贊曰陳勿齋事業燦爛功流閩海國僑云亡杵者不相一傳而有恭愍方知水源木本之有自也侯仲璣校文禮闈首拔商文毅知人其難哉耿直不避閹宦又其行誼之卓然者葉尚本義嚴取舍至死不移所謂介于石非歟余懋器郭

仲端蹇蹇匪躬直道不回所在去後垂思皆所謂醇德君子也陳正初清標拔俗化洽宮牆浮雲人爵長揖而歸逸菴之澤不衰矣林典卿勤郵民隱歿無餘貲清風介節均足紀也已

陳世良字崇之號青嶼恭愍從侄成化癸卯薦于鄉登丁未進士初授樂安令邑勇悍成風公恩以撫之威以震之爬梳櫛剔宿弊盡革吏畏民懷丁丙艱去任民越境攀號不忍舍服闋補南和令下車卽新先聖廟嚴諸生教條親爲講解時考較以勗

其成設社學十有七以訓編戶子弟表唐賢相宋廣平里以勵士風築堤以障汚田數百頃上植雜樹以固其基鑿渠三十餘里引澧水以溉高田遇澇則洩而歸之河旱澇有備民受其福置預備倉糧以萬計饑窘有所依賴請減牧馬場歲徵租銀舊額之半鄰封並受其益且懲奸撫善清賦均徭窮獨無所歸者有養婚嫁歛葬不能舉者有助由是邑之逋逃及四方流民咸回里復業輻輳來歸戴之若父母當道交薦擢監察御史正色立朝彈

糾不畏強禦初巡三關邊寇震服暨按南畿激揚
有道風采凜然時逆瑾干政公抗疏言之爲瑾所
忌正德二年遷南京大理寺右丞未幾中以事罰
贖米三百餘石至轉貸於人完納五年瑾敗首擢
爲大理少卿六年拜右僉都御史兼管操江適流
賊猖獗悉心防禦申明號令督戰所至克捷屢疏
乞休得請卽飄然東歸旣歸杜門却掃惟與賓舊
徜徉湖山之間正德戊寅起應天府尹未任己卯
卒于家所著有青嶼稿奏議等書今祀鄉賢

蔣顥字思誠號介石父鏞學行端方人稱爲鈍菴先
生以舉人署南靖教諭得士子心公幼承父訓淹
博經史成化癸卯薦于鄉丁未成進士授南刑部
主事熟諳律例遇事輒迎解無滯丁母憂起復陞
本部員外辛卯轉湖廣按察司僉事分巡武昌爬
奸剔蠹風紀振肅時苗寇發鄉民不逞者往往嘯
聚山谷公區畫招徠地方賴以甯謐吉府儀賓殺
人糞以賂免事露立抵以法不少貸值鎮守闕張
忭爲劉瑾腹心怙權肆虐人莫敢稍拂之者公巡

歷長沙右衛指揮張青索軍人財不遂囚死其父
又蘄州衛指揮王欽以貢綠毛龜指取部下賊露
並置之法二指揮重賄怵爲請公不爲徇并笞其
投刺者怵大怒曰蔣監司爲文深刻故人人罪縱
不爲怵地獨不爲劉公地耶密白之瑾瑾諷當道
媒孽罷官公具疏辯廷臣多直公言怵鞅鞅俟公
歸後摘任內遠年積案移參罰米二百石行本省
臬司追取公家徒壁立有司代爲輸納瑾憾尤不
釋輒嗾浙臺伺公舉動公角巾入石塘方山力耕
自資幾十年僅得免會瑾敗朝廷理公前疏晉階
三級致仕家食五十年清約自持有司常不得見
其面居止數椽堂下僅可旋馬會郡大火民房官
署殆盡獨公居與節婦范氏居無恙時有上留蔣
清官下留范節婦之謠嘉靖三十一年壬子卒年
九十有五所著有達意錄今祀鄉賢

秦文字從簡號蘭軒晚號雪菴自少穎敏絕群博通
經史宏治壬子鄉試第一明年登進士乙卯授南
京行人戊午轉司副四方聞其名從游甚衆丁父

艱服闋陞刑部郎中時逆瑾干政羅織京官每下刑曹公以身殉法不爲少假借讞獄精明老吏皆以爲不及瑾竟不能害遷貴州提學副使兼兵備事教士外區畫方畧軍民便之丁母憂服闋補陝西督學懇懇以行誼勗諸生抑奔競黜浮薄兩地士習爲變入覲嬖倖錢甯輩前後來視輒謝不見遷河南左參政抵任覩河洛居民蕭條而武宗荒游無度徵調日急慨然告病而歸杜門教育子弟及鄉之後進足跡不入公府天性至孝九齡喪母

哀毀如成人父沒每出入經父所常寓地必惕然感傷舍車徒步而過嘉靖己丑卒于家年六十有七所著有憤東集關中等稿祀鄉賢

秦禮字從節號樗菴父彥彬生三子俱登進士長文季武公其仲也四歲失恃六歲授經書輒成誦長而究博六經俊髦咸受教於其門宏治乙卯鄉薦己未登進士授常熟令直道正性執節不阿先是邑貴游歸鄉邑令盛供帳厚儀品迎諸郊率以爲常公一切削之嘆曰是掠民以取媚吾不忍爲也

時鄉貢有蔽匿罪人者曰政廢若是何以令爲卒
執治不少貸用是民德之而怨叢厥躬調鉛山益
自振飭正德丙寅丁父憂服闋時逆瑾柄政改授
貴溪教諭瑾敗陞南工部主事轉刑部員外陞福
建按察司僉事生平性剛方疾惡如仇所在剔蠹
除殘恬於進取壬午引疾乞歸未得報輒行李于
崇安及奉旨已謝世踰月矣年五十有三所著有
蓄德集今祀鄉賢公配包宜人嘗夢僊妃懷數棋
子遺之於是連舉三子長鳴春舉人官刑部員外

次鳴夏季鳴雷各有傳

蔡潮字巨源號霞山宏治辛酉鄉魁乙丑會魁選庶
常丁卯改兵科給事中戊辰分考禮闈所拔多名
士在諫垣慷慨敢言中外想望風采適逆瑾當事
建議閱驗天下府庫虛實遣言官中貴人雜出意
在擊搏漁利公奉擇詣閩務惜元氣存大體閩人
懷德庚午轉右給事中辛未遷湖廣按察司僉事
提督學政力振士習校閱精嚴湖湘人文振起乙
亥轉貴州右參議時清平苗寇據香鑪山以叛勢

搖全省公至鎮遠賊猖獗圍城數重公誓死以守
間道轉餉士皆奮勇先登竟賴蕩平自鎮遠距省
城凡七程重岡複嶺崎嶇嶮絕旅行數十里無所
依止公每十里爲之創亭翼然相望壬申轉福建
右參政督糧儲悉心籌畫軍糈給而兵民不擾泉
漳二郡樹碑以表其功閩山路崎嶇相地險隘輒
爲梁亭如萬里林鹽田谿北嶺飛鸞雲嶺一帶蒼
蔚悉爲康莊丁亥轉河南右藩時兩河盜賊充斥
令郡縣道周悉種榆柳俾木植成行不惟賊騎難

於出沒且薪蒸亦資民用汴人賴焉未幾具疏乞
休撫按交留疏凡五上乃得請旣歸徜徉山水吟
咏終日好讀書手未常一日釋卷性孝友睦族卹
隣親戚故舊以匱乏告者靡弗周襟度宏曠不立
城府凡道路津梁圯壞者捐貲修葺如平大惡灘
建邵家渡橋移三江埠疏泉井洋凡可以利物濟
人者爲之無遺力懸車二十餘年如一日也歲中
每值旱澇輒持齋率鄉耆詣神祠祈禱靡不應已
酉夏旱禱祠冒暑致疾卒年八十有三所著有雷

山集今祀鄉賢子雲程另有傳

葉忠字一之號山南正德庚午舉于鄉辛未聯登進士授重慶府推官折獄明允剛方敢爲總制彭澤深器重之擢江西道御史適武宗巡游無度公首疏端聖躬惜大寶任老成言甚剴切及出按江西南四郡已卯值宸濠旣誅武宗南幸江彬張忠張永等用事駐南京經年官民塗炭言者輒以爲罪公詣行在奏稱甯藩不道幸都御史王守仁憑仗天威誅元凶繫行在此正陛下振旅還師之時也

顧乃悠悠六飛遙遙歲月自燕而交自交而徐自徐而淮而揚俾道路苦于候迎州司疲于供應人心搖於疑似邊外傳於非笑殆必讒佞之人惑於左右眩於是非而不爲陛下陳利害之實也武宗亦不之咎庚辰元旦錫燕羣臣上特問葉忠何在時論榮之隨丁外報服闋嘉靖癸未補河南南道御史遇事敢言前後無論百十疏如參奏貴戚陵萬言鄔景和及妖僧師空內侍崔文等皆人所不敢言陞大理寺丞終于鯁直觸時忌外轉福建僉事

便道歸家遘疾卒所著有行臺諫垣等稿山南集
贊曰武宗之際逆瑾竊政毒流縉紳士君子莫
不高薛方之義燭梅福之幾陳青嶼以抗節見
忌蔣介石以孤標受抑或功施末路或節著衡
門皆所謂白玉無玷磨之彌潔者乎雪菴仲節
早年掛冠可謂急流勇退矣蔡霞山采榮商山
膏流梓里鸞鷲時鳴啟於後昆作善降之百祥
不誣也葉山南廻鑾一疏侃侃不避權貴卒使
折檻之風見容於永始延平豈非所僅見者哉

陳器字德器號三石璫曾孫正德癸酉解元甲戌聯

登進士授淮安推官持三尺不畏強禦郡有鎮守
總戎舊例府丞以下咸北面禮之公力爭於督撫
曰安有科第文臣而屈膝武官者乎獨與抗禮遂
永著爲例陞刑部主事執法多所平反司寇取衷
焉會武宗巡游儲貳未定抗章奏請早選宗室之
賢者養於宮中如宋仁宗育英宗故事言甚愷激
人咸爲危尋以予告終養回里適永嘉張孚敬久
困公車過台以制藝造門請益公不之推許及世

祖時永嘉得政公服闋竟不赴補居家四十年杜
門却掃足跡不履公庭布衣蔬食誘掖後進四壁
蕭然怡如也或勸少趨進爲後人計公曰吾盡吾
分已矣何能爲兒孫作牛馬耶年七十五卒于家
所著有讀律膚見潁川世系石居漫興等稿

戴時弁字貞甫號東華宏治進士侍御乾從子幼敏
異通五經諸子百家言正德癸卯以春秋領鄉薦
嘉靖癸未成進士對大廷二甲例授京曹有時貴
重其才名啖以館職公曰結與援以進此吾讀書

時見之而面發赤者今忍蹈之耶以此忤出知毫
州蒞任未幾以母老乞養歸與先輩秦雪菴同年
蔡鶴田諸公日以詩文相唱和當道罕識其面丁
母憂服闋擢工部員外督木四川有功陞河南按
察司僉事整持風紀廉介著於中州卒以骯髒不
合上官致仕性耽山水游屐徧名勝宦故薄不能
備輿人畜一驢以代步墮驢傷足嘗作墮驢謠所
著有東華文集子五人各授一經汝愿汝愚後先
登賢書汝慤富陽教諭汝憲汝懋俱名諸生

周寵字君錫號東山嘉靖壬午舉于鄉登丙戌進士授儀真縣勵志清白不受饋遺吏畏民懷以才調江西繁昌士民夾道攀送車輪不得前治繁昌一如治儀真縣貧而糧額歲缺以恩信感激民皆樂輸無怨言歲旱發公私藏粟賑濟全活甚衆政聲懋著擢江西道御史巡按山東時宗室德藩故驕橫多縱左右行不法公守正不阿特疏彈劾一時權勢人皆爲避去及致政歸結社林下多與後進考德問業故今子孫多以能讀書聞云

秦鳴夏字子亨號白崖僉事禮仲子幼聰敏日記數千言僉事公卒于崇安公年纔十歲扶襯執禮如成人伯父參政公文奇之曰吾弟不死矣嘉靖辛卯舉于鄉明年登進士授翰林庶吉士甲午轉編脩乙未會試同考丙申奉命冊立魯王戊戌扈從謁山陵應制撰太上神冊表己亥春哀冲皇太子立簡用輔導拜右春坊右中允兼翰林脩撰庚子補經筵講官同脩大明會典是時世宗日御經筵親儒臣公在衆中魁偉長髯隆準白哲舉動端暇

尤爲上所眷注辛丑再奉命冊立周王明年以會
典成賜金綺時以薛文清從祀孔廟議者以瑄無
著述公上疏言瑄反躬實踐厭斥支流溯尋正脉
使學者曉然知所趨向其爲功不在著述下識者
躋之癸卯主順天鄉試同主試官不檢縱其子先
與士子交游比揭曉交游士與首相翟公兩子皆
中言者擊之而交游士非公所取而翟公子實才
宜第故同官黜去而公無議明年會試宰相兩子
同登進士衆口漸騰下諸試官詔獄并株及公獄

具罷秩還里公氣素豪邁竟以註誤見廢心跡不
白居恒邑邑益肆力詩文表見素志壬子倭寇發
公條陳利害情實與夫戰守之要悉中機宜於是
撫按皆交薦其才詔起兵部主事道至彭城疽發
背卒年僅五十今祀鄉賢祠

贊曰仕進之難也先作台然後引之大道持方
柄而內園鑿其能入乎三石東華二公優游泉
石以全吾素賢矣哉周東山琴堂得烹鮮之術
繡衣有埋輪之風宜也白崖懷瑜握瑾揚聲紫

闔茲時之垢膩欲嚼然泥而不滓難矣訾夷齊而毀共姜賢者能無鬱鬱乎

蔡雲程字亨之號鶴田霞山公長子幼穎異十歲從父督學湖湘過黃鶴樓題詩曰江到望窮天作岸鶴隨仙去地餘樓爲一時傳誦舉正德己卯鄉試嘉靖己丑進士選庶常以相臣議不協選者悉報罷庚寅授南兵部主事轉郎中舉舉有聲癸巳調吏部稽勲司己亥陞雲南提學副使滇僻處天末文風未振公刊行文章正宗以廣聞見崇獎節義

申明儀禮奏建馬龍州祿豐縣學宮癸卯陞貴州叅政駐節銅仁時苗寇竊發三省動搖孤城僻處悉心籌畫戰守兼施事平賜金綺乙巳晉滇臬丁未陞廣東右轄隨進左廣南故稱財賦之區積奸侵漁公親較簿書出納精覈值兩廣流賊煽熾復以督餉勦平功賜白金己酉丁父憂服闋壬子補江西左布政宗室祿米頒發紛拏籌度有方公私稱便癸丑陞都察院副都御史巡撫本省三司皆舊同寮不立等威不偏徇比吏畏民懷時倭奴發

難省直震驚公嚴兵九江爲江浙聲援甲寅陞南
京兵部右侍郎署部篆乃下令嚴城守謹間謀選
精銳爲先事之防以是倭寇無奔突之虞南京終
以甯謐乙卯改刑部右侍隨轉左先是冢宰李公
爲權貴人訐奏下獄合理官雜議衆咸顧望依違
公獨挺然議當從輕遂落俸三級士論重之丁巳
陞南京都御史秉法章軌薦海內人才如唐荆川
胡栢泉輩咸得不次擢用己未陞南大司寇隨改
北京盡心聽讞惟公惟慎人比之漢于張唐徐杜

焉丁毋難服闋候召間以隆慶丁卯卒于家年七
十有四公體貌端重儀型足望卽閑居危坐身不
傾倚嘗書先正格言於坐隅日明鏡止水以持身
泰山喬岳以立身青天白日以應事光風霽月以
待人晚築讀書樓於祖廟之旁晨夕宴坐手不釋
卷所著有鶴田集行世祀鄉賢

秦鳴雷字子豫號華峯生彌月失母五齡失父幼出
嗣于世父大叅公文其配楊夫人子之未幾大叅
亦歿家益落屢試弗售時兄鳴春鳴夏皆先貴楊

夫人每舉以相勗益讀書不懈至嘉靖癸卯領鄉薦明年遂成進士廷試閣臣進呈擬第三世宗親閱卷擢置第一時方祈雨郊壇覩其名復大喜次日公以例謁嚴嵩嵩曰我不敢貪天功君乃天子門生也授脩撰丁楊夫人憂服闋補前職丁巳以九載滿陞左春坊諭德歷南京國子監祭酒禮部右侍郎乙丑會試主考取陳公有年王公一鶚太倉王公錫爵後皆爲名公卿時長陵神道橋圯巨璫請改建派費十萬餘金爲自潤地閣臣以陵寢

大事未敢可否烹擬旨下禮工二部相度舉工司空以物料工匠爲已任而以經始事屬禮曹公率衆量基而潛授指于擇日臺官明日臺官報曰明年不利興造須二三年後乃可舉行羣璫喪氣事遂寢丙寅改吏部左侍郎兼學士總校永樂大典尋教習庶吉士會有浮言亟疏求去隆慶辛未起南京吏部侍郎尋陞本部尚書會穆宗登遐典禮叢雜悉公手定萬曆改元江陵與新鄭不合公爲新鄭所見知隨上疏乞休家居二十餘年凡吳越

名勝山水無不窮探萬曆二十一年癸巳卒年七十有六所著有倚雲樓稿及談資祀鄉賢

何寵字文峯天姿明敏爲諸生與弟冢宰宜山公砥礪切磨昆金友玉舉嘉靖癸卯鄉試癸丑成進士授無爲州知州適倭寇自海洋突犯蘓州轉掠長洲吳縣蔓延常熟江陰無錫之境出入太湖流劫南京及江北淮揚廬鳳攻破郡縣莫有禦者時趙文華視師功罪倒置倭益猖獗乙卯夏四月至圖山山北等港犯無爲州公令州同知齊恩率舟師

往迎時州無兵恩帶長子尚文次子嵩叔仲實弟寶榮姪慎寅等孫童家人錢鳳等二十一人同往嵩年十八驍勇善射獨前追賊斬首百餘級至安港賊伏兵發恩一門皆死止嵩慎寅三人得脫倭遂乘勝圍城公白計守禦賊竟不能破而退州人德之祠公于城西宋米芾墨池之東蓋芾常爲州守以公之恩與芾等也丁巳江北倭盡殄以功陞南刑部廣東司員外郎歷郎中出守廣東潮州府左任五載恩威並濟字民如子民久益愛戴卒于

官百姓老穉皆巷哭相與建祠祀之屢顯靈應至今香火不替子孫世登科甲今祀鄉賢祠

何寬字肅之號宜山母孕時隣人有夢赤日墮其所居鳳凰山者公適生幼聰穎絕倫爲諸生博綜書史尤究心於真西山邱瓊山大學衍義日經世之道盡在此矣嘉靖庚子舉於鄉庚戌成進士授南刑部主事歷員外廣東司郎中留都事悉隸廣東司公聽斷明允案無留牘有富室殺人賂富道希免訊得其情立抵之法幕員恃大司寇親資餽事

露竟按治不復徇顧出知成都轄三十餘邑事迎刃解時採木之令甚嚴悉心籌畫上不廢公下不病民撫按交章論薦治行爲西蜀第一壬戌大計舉卓異擢湖廣按察司副使職屯鹽改督學廣西嚴條約申課藝邊徼遠郡人文蔚起陞河南參政稽出納革羨耗晉湖廣按察使丁母艱服闋仍補楚臬摘奸剔蠹甫數月中外交薦凡二十餘疏擢都察院右僉都御史巡撫入閩時閩久罹倭患歲募客兵糜廩餼無裨戰守間井騷然公至精選士

著壯丁畫地汛守主兵旣練客兵漸除歲省供億銀六萬餘兩減歲派丁米以紓閩困廣賊歐老寇彭湖公按節漳泉命將出師賊聞風遠遁所至廉察官察彰善瘴惡詢民疾苦二載陞大理寺卿會宥武弁以他事繫獄奉調將兵赴邊公卽爲竟其事遣行拂直指意遂參奏總戎賊繼光并及公奉旨候勘萬厯改元直指以內計謫去太宰楊襄毅覆曰挾誣者旣被斥受誣者復何罪事得白改右副都御史提督操江時承平日久江務廢弛蕪湖

庫藏被劫公蒞任嚴汛防添荻港水師增置哨船分佈關隘奏請築蕪湖城緝捕亡盜六十餘人梟於市境內肅清陞工部右侍未任隨進左署部篆時徐淮二河圯決議疏草濤以挽全淮築高家堰寶應等堤委修乾清宮告成暨河橋竣功兩賜金綺尋晉南大司寇屢疏乞休溫旨慰留旋改南吏部尚書公以清望膺茲特簡竭誠報國黜陟賢否務得其平遇內計時相張江陵屬有所黜公以其人係海內名望不愜意遂風言官訐比部郎某嘗

法事株引公遂力請骸骨居里五載優游書史如同寒素桑梓有大利害不靳力爲如陳雲伏闕奏減鹽稅下計部得允所請疏稿更自公手至今商受其利丙戌夏以無疾而終年七十有三所著有宜山集今祀鄉賢祠

贊曰三尚書席承平之世仗策登朝致身通顯可不謂榮焉冢宰司寇皆敷歷中外三十年功名之際銖累寸積嚴以持已厚以待人慎於進而勇於退前後一轍也宗伯早年掇巍科優游

林下二十載與人和易胸無城府常肩輿過市市人亟撤其張棚旣知爲先生啐曰吾以他貴人來乃秦狀元耶其坦懷不爲人所忌如此若潮州蹟懋廬江恩纏國僑而功施未竟惜夫

張志淑字彥夫號石橋生而穎異美丰儀性嗜書無所不讀嘉靖甲午領解浙江年方弱冠上春官屢不售以父老謁選授瑞州司理江右俗險而健訟瑞爲尤甚妬惡嫉邪人不敢奸以法嚴嵩柄政縉紳趨驚如市公蒞其鄉半刺勿與通屢薦剡分

宜持不下久之遷南刑部主事陞郎中出知思恩府會獠寇攻城有守禦功時礦稅方嚴中使釋騷民不堪命慨然曰吾少掇科名仕宦二十年曾不得少展以報朝廷久鬱鬱邊方何爲遂致政歸還家惟圖書數卷而已棲遲衡泌十餘年而卒

馮應騏字楨卿號續菴幼敏異有神童之稱年十二爲弟子員十六食廩餼嘉靖壬子領鄉薦赴試南宮主考太倉王公錫爵奇其文拔爲冠場一時手其卷玩不已因納之袖中及揭曉索卷不得榜旣

定更衣始獲之嘆其數奇深以爲恨遂延請於家授其子太史衡經後衡中北雍解元會魁及第公此時館穀相邸父子師生相投洽聲譽日隆值門戶之說興屢試禮闈王者多引嫌坐不第謁選釋褐河南許州知州旣蒞任重士愛民威惠兼至政聲爲諸州最南二載卒於官民甚惜之

項思毅字敬敷號立菴宏治進士匡之孫嘉靖戊午舉于鄉壬戌成進士授刑部主事調工部屯田司督脩三殿有功賜金幣陞陝西漢中知府轄二州

一十四縣最稱煩劇又洋州四鄉之間多劇賊公
繕城池勸農桑築隄脩堰數百處褒城鳳灣三邑
賴以溉田萬餘畝歲豐稔人民樂業盜賊不發郡
賴以安陞湖廣叅政剗革宿弊得士民心晉廣西
廉使致仕歸居家悃禮讓友愛兄弟子姓醇謹有
萬石家風今祀鄉賢祠

馮學易字韋卿號乾所自少強敏記問過人爲諸生
試輒高等登隆慶丁卯賢書授河南西平縣悉心
民事撫字有方寬猛適宜六載人吏和洽有疏能

聲陞淮安管河同知河道自景泰以來歲決歲脩
迄無成績時議濬趙渠開泃河上下相度効能贊
襄築堤固岸不遺餘力迄河工告成自朱旺口至
小浮橋袤百七十里河歸故道叙功晉長蘆鹽運
同知兩攝使篆洞曉醴政吏不敢欺一槩羨餘悉
無所受人服其廉生平性恬淡轉河南運使未任
卽致仕歸足跡不入公府年七十四卒於家

蔣承勛字繼之號蕙齋楚臬僉事公顯曾孫年十歲
能習漢書客戲之曰子齧齕而手漢書亦知漢高

之所以帝平應聲曰韓以戰張以謀蕭以餉客大
奇之萬厯丙子薦于鄉上春官屢中副車授南涇
諭丁憂補新城署廣昌縣厯有治蹟丁酉陞東流
令首除供具以甦里甲清驛遞侵牟之弊革兩造
先納帑錢陋規尤精於讞獄浮梁黃士鳳與樂平
何天俸並客於東歸家而鳳橐饒俸覬之中途刃
鳳腹挈其篋而逃公聞疾馳視之微息尚存稍稍
言其狀而斃賊犯于他郡吏胥以爲辭公勿許密
移文饒州遣役伺於娃館獲之械至定獄萬口稱

快郡豪汪一滄習符呪立能死人利兄貲斃四命
而盡奪其產遺腹孫寄他姓獲全寃久未雪赴公
愬公戒勿泄越日集丁壯托他行倏至滄家備得
符咀狀按實坐大辟悉還其貲諸所擘畫具載東
流遺愛碑中兩臺交章薦陞湖廣黃州同知黃帆
艘鱗集狙獠出沒下車清軍役盤獲巨盜招申棄
市一境肅然荆府宗藩驕縱凌民巨璫李忠奉旨
謁陵虐用民夫公悉折以理不爲屈具有乃祖清
介風治蹟爲三楚冠轉蜀藩長史致政歸卒年六

十有六所著有麟經心印吳楚讞存覆缶集子四人皆有聲庠序季典學字德脩號宗華生有慧質年九齡日能讀積寸書稍長貫串關閩濂洛之旨嘗註疏左傳國語抄本性孝友父病晨昏侍湯藥衣不解帶居喪三年不入私室念兄正學以讀書勞瘁終遂以已貲二百金所置佳城讓之尤爲鄉里所稱重滄桑之後以諸生終于家公子姓多象賢此尤其白眉云

陳承翁字乾甫號元齋器之孫幼年攻苦隆慶登極

舉明經萬曆己卯中順天鄉試授湖廣衡山知縣首革漕弊清理積蠹庫銀七千餘兩廉慎有容撫民如子丁艱服闋補黟縣秩滿陞四川潼州知州調雲南羅平州經歷險阻夙夜勤劬屢膺薦獎竟以計典被黜歸四壁蕭然年六十餘著憑枕編自序云陳生者生平抱志厄於一第終身負歉每遇青雲之士甘讓頭地故不敢侈稱惟自命陳生云耳生素鮮疾偶患足疾誤於庸醫移之腹心經年不起伏枕無聊掇拾生平寸名微踪著於篇什以

代呻吟自媿未陟膺仕又乏懿行可述覽者易厭
 因兼取嘉靖乙卯至萬曆甲辰凡一切可悲可喜
 可驚可愕之事銓次并錄焉俾有志桑梓遺事者
 亦得竟閱是編而興慨矣嗟乎太上忘言其次有
 言至於滿腔抑鬱不得已假之言以鳴不平斯爲
 下也則斯編之謂耳亦足以見其苦志云

贊曰士君子讀書乘時雖膺一命志期有濟石
 橋纈菴俱以夜光之璧偶顯價於卞和瘞影荆
 山勞心民社勿克大展其用立菴有賣劍買犢

之風而溝渠之利在人乾所才優潛河計獨鹽
 筴蕙齋淹通博達明於吏治折獄平允更稱一
 路臯陶皆有本之學故見之事功歷歷碩畫如
 此陳元齋豈才不逮而學不足哉諺曰人皆集
 於苑已獨集於枯自古道之矣

陳三槐字用慶號晉堂爲諸生時苦志勵操究極羣
 史平居儀度整肅不假脩飾而規範自然萬曆壬
 午舉于鄉教授青溪以成就後進爲務凡受其陶
 淑者文學德行卓絕流輩陞廣東廣州府司理時

天下市舶俱屬宦官提舉所至任用市棍魚肉百姓公至冰心鉄面持三尺不避權要首拿市梟朱少軒關天成等立斃杖下士民聚觀無不忭舞稱快諸璫日夜思中以罪一日緹騎入省城衆皆以爲逮公時臺使李公命公歸別家人公曰兒女啼號徒亂人意遂坐以待已而知其詐亦不以爲喜初璫欲强番陽令黃琰行庭謁禮琰不爲屈公邀琰至署連揖之曰公不拜豎我當拜公在廣五年一塵不染每奉命查巡縣官不敢妄投一刺視苞

苴餽遺如劓如黥天性然也陞南康丞未幾丁外艱歸卒于家今祀鄉賢于函輝見忠義傳

王亮字穉玉號樓峯爲諸生濶畧不羈與王恒叔同講學於武林天津書院又同舉萬厯癸酉鄉薦丁丑進士釋褐進賢令以強項聞時張江陵柄政奪情永豐老儒梁汝元以詩投居正勸其終制且揚言入都面斥之居正怒授指有司會湖廣貴州界獲妖人曾光竄入汝元姓名云謀不軌擒解赴京道出進賢公手釋其縛給以輿夫居正聞之怨刺

骨六年不調迨居正歿授兵科給事中遇事敢言
首祛江陵弊政請召用言事被逐諸臣鄒元標等
論僉都御史郭思極前提調江西鄉試中居正子
嗣脩太僕寺卿張彥前爲禮部郎中爲嗣脩代筆
得中進士疏上公論大快時執政曾王會場深忌
之外轉湖廣僉事丁父憂服闋補四川驛傳道適
秦中饑官兵鼓噪邊寇告警陞苑馬少卿管兵道
事分巡陝西公兼程赴平涼賑饑民安叛兵躬詣
邊城籌畫戰守機宜會甯夏復叛奉命協討條議

行反間造雲梯用水攻兩臺交薦有邊方材不報
事平賜銀幣而已久之竟以註誤落職終福建運
鹽同知公任直道觸世忌投閒林下十餘載卒于
家所著有穉玉集今祀鄉賢

王士崧字中叔號禺陽襄裕長子年十四補弟子員
萬厯癸酉薦于鄉癸未與仲弟士琦同登進士授
光州守光故饒而歲稔民逃野蕪不治公甫任下
農桑之令罪游惰之不任耕織者期年黍稷盈疇
機杼之聲達閭巷夏旱宿齋壇三日雨大降衣冠

立滂沛中觸雷電勿少移州人歡呼載道光士嫺於文而解額缺拔其尤者爲社會餼供甚厚是秋獲雋皆公所知士其他摘奸發伏有神君之譽陞工部員外董工山陵聞父訃哀痛不欲生諸貴人唁者悉不報會京察遂有脩郤者服除補鎮江通判丁酉陞刑部主事戊戌卒于官年五十所著有支離吏隱浮弋等稿祀鄉賢無子以豐輿公仲子立程爲嗣萬曆辛卯舉人

王士昌字永叔號斗溟襄裕公三子幼多病失學年

十五始治春秋新建少保吳桂芳字以女招贅江右踰年貫穿經史旁及聲詩無不嫻習萬曆己卯年十九魁順天鄉闈丙戌成進士授龍溪知縣以賢能著聲行取授兵科給事中遇事敢言歷吏科給事轉禮垣督餉浙閩復命會儲宮未定已經一十六載言者輒得罪至是爲萬曆二十九年公上疏極諫神宗怒謫鎮遠典史然心已動矣是年十月遂册立東宮公在黔八月戊申起刑部郎轉大理寺丞旋陞光祿寺卿轉大理寺少卿四十三年

挺擊事起神宗召百官宣諭止處本內有名人犯
餘不許波及時公班在後直上御前朗誦本內張
差劉成龐保等五犯名上躡之隨問近侍彼爲何
官左右以名對上目久之會海警告急戊午陞都
察院右僉都御史巡撫福建蒞任勦撫並用多建
殊功以天變求直言疏侵當軸罷歸公操履端方
自二十七喪偶終身不再娶天啟四年卒于家年
六十有六所著有三垣摘疏鏡園草今祀鄉賢

王萬祚字君錫號一固生而體貌朴古氣骨稜厲爲

諸生時治經術有聲尤長於詩萬厯辛卯舉於鄉
乙未登進士釋褐當塗令甫至先問大姓王名爲
民積害者得若干人悉置之法豪強爲之屏息諸
革羨耗嚴保甲爲民興利剗弊政聲大著丁父憂
服闋補汝陽令治法悉如當塗邑災單車問民疾
苦爲請緩一切歲征民感激急公而額賦更以早
完俗窩訪徒黨甚盛廉得其實置於典不少貸於
是習姦者皆革心以異等擢南京福建道御史彈
劾不避權貴其諫神宗䟽痛斥時弊亶亶百千言

南北爭爲傳頌奉差巡城奸人相戒勿犯王鐵面
出按下江貪墨吏望風引避去所糾者皆大僚大
奸而么麼纖猥者率置不問差甫竣而逝所著有
留都疏草及樹瓢鳴今祀鄉賢

贊曰陳晉堂行誼竣拔骯髒不阿宜其有後乎
吉水鄒元標有言玉剖而良桂伐而芳台山以
嶽崎聞自正學先生外代有偉人予退耕二十
餘年常思臨海二王矯矯班行無諸臣媚子相
未嘗不爲神往二王者謂樓峯與恒叔也樓峯

可謂賢矣王禹陽處孟陽季陽之間於斗溟則
又僧彌難爲兄也然才各有長在邑學爲循吏
在朝學爲直臣吾事畢矣爵位何有焉二固氣
蘊逆鱗色形匪將古之所爲不畏強禦者非歟

周頌字仲美號龍符幼聰穎讀書過目成誦家甚貧
年十二同里葉元鏞負知人鑒一見奇之以女字
焉自是益得肆力盡讀百家之言萬歷丙午鄉薦
庚戌成進士授工部主事歷員外郎中出守揚州
連丁內外艱服闋補武昌太守省會殷繁宗藩驕

倨飭躬端範藟折以理咸帖然無敢譁尤嘉意學
校多士歸心天啟壬戌大計舉卓異爲天下第一
賜燕禮部頒文幣擢按察司副使分巡常鎮道興
利革弊沛然有爲時朝堂門戶角立東林諸公幾
幾不自保公羽翼善類一時倚重丙寅魏璫遣緹
騎逮左都御史高公攀龍高公密繕疏夜半整衣
冠謝闕赴水死同月又逮吏部主事周順昌順昌
素得鄉里心從容就逮諸生王節楊廷樞等暨合
城數千人遮懇巡撫毛一鷺疏救毛汗流不置一

語義民顏佩韋等不勝忿叢毆緹騎立斃一人諸
閣黨皆逃竄吳下鼎沸逆璫矯旨捕高公子世儒
頂解坐鼓噪諸生以漏旨株連林下縉紳鄒嘉生
輩勢釀不測公遂渡江詣兩臺極言狀冀爲銷輯
毛公難之公爲泣請出袖中疏草呈毛公謂如是
似當無咎毛閱之至順昌奉旨縣官往卽就逮當
令府縣爲促開讀而官旂不應留連需染訂期十
八日致生遠邇之心等語因相顧首肯曰如若草
攀龍已死其子當亦見原不獨可全活諸紳士於

順昌一案易了也隨少節其稿以上竟得旨不深
究止置佩韋等五人於法餘一無所問嗣瑞偵知
其事褫公官歸未幾崇禎改元忠賢敗起補湖廣
布政司參政束裝間忽中疾卒是年鄒嘉生亦起
補浙江海道感公舊恩奠章纍千餘言所著有清
嘯集今祀鄉賢

張昌辰字漢明號對文嗜學博聞尤工於春秋爲諸
生二十年屢困場屋志益堅蘭膏鐵硯不辭寒暑
萬厯癸卯鄉試畢主司葉公向高燈下披閱間恍

惚有人向前頻語皇天不負苦心人葉細閱其文
果雋遂魁春秋及榜發與宴鹿鳴葉一見大驚謂
恰如燈下所遇者乃知攻苦所積精神之默相召
也鄉薦後困公車又十年癸丑捷南宮授豐城令
豐世宦巨族橫行鄉里公下車廉得素豪右侵民
舍歛債折人子女數事白於上司悉置之法曰長
吏不染一點塵地方敢撓三尺哉豪強聞之不寒
而慄邑中大治兩臺交薦而公已告殂卒之日囊
篋蕭然無以爲殮豐人悲號如失怙恃爲立祠尸

祝焉所著有麟經家言

陳蒙吉字伯明號毓陽員韜五世孫生而穎敏精舉
 子業年十九應萬曆己卯鄉試主司得其卷拔置
 第二名副考必欲以為冠爭之不得怒曰甯留下
 科作解頭也竟列副車後逾二十五載至癸卯始
 雋授河南滎陽學諭遷山東魚臺知縣深達治體
 與民休息釋訟勸農有古循吏風性介潔明察吏
 無敢欺新學宮日與弟子員講論經史時蝗蟲發
 所至郡邑野無青草過魚臺飛逝不集人皆異之

前後剡薦以老母乞終養歸優游林下杜門不預
 外事家居端方言笑不苟年八十一終于家子五
 人鶴年嵩年椿年兆年皆庠生登年太學生
 何舜齡字廷永號蘭汜潮州守龍之孫家世清節食
 貧力學與從弟舜岳舜韶朝夕切磨後先皆登甲
 乙榜公舉萬曆己酉鄉試庚戌癸丑兩中副車秉
 鐸蕭山模楷多士凡受其蒸陶者立脫穎去擢安
 遠令多惠政砥礪廉隅門以內冰清門以外春盎
 邑苦逋賦為核產分戶均役平輸民便之天啟乙

丑陞泉州郡丞時鄭芝龍寇漳泉勢浸大其黨李魁奇劉香老輩聚徒數萬流劫沿海芝龍駐於漳浦之白鎮巡撫遣都司洪先春率舟師往擊大敗芝龍故有求撫之意舍先春不追復獲盧游擊亦不殺泉守王猷言於監司鄧良知曰芝龍之勢如此似有歸罪之萌今勦難猝滅撫或可行不若遣人諭意退舟海外許立功贖罪可以得當監司上其事于撫按欲遣難其人以公才德素優遂令公往公下海見芝龍開示禍福芝龍遂傾心歸降願

誅魁奇等以自効漳泉遂平公復親歷澎湖諸島相度機宜條議善後策報命巡撫南居益直指周昌晉交薦公能方擬大用會南公與魏璫相左寢不報陞山東運同蒞任未幾告病歸宦橐蕭然敝廬數楹僅蔽風雨至崇禎壬申卒年六十有七孫紘度登國朝壬辰進士令臨晉以廉節世其家贊曰吳中民變使當時嚴旨稍敦切勢必斬竿揭木而起藉曾太雲移書貴池相國擬旨寬貸吳民以安然龍符疏草之力亦不可少乎張對

文精神默通感格知己奇矣尹儒受秋駕於其師何足云也昔徐栩台小黃蝗蟲過而不集刺史行部奏栩他事相去官蝗卽踵至刺史謝過令還治蝗復遠去以視毓陽誰謂無之何蘭汜功成陸賈若非德望信於平日則南海他何渠不若漢哉惜好時閑居未竟其所長乎

皇清蔡宸恩字祚眷號起霞明刑部尚書雲程嫡孫爲諸生潛心制義桑硯幾穿萬厯戊午舉于鄉登崇禎戊辰進士授甯國推官廉直無私挺正嫉邪

庚午分校鄉闈所拔悉知名士不善事上官左遷玉田知縣益凜清白嚴革羨耗屏絕饋遺舉卓異陞工部營繕司主事會火藥局災同寮槩受大辟公獨以清望獲免罷官歸狎鷗挽鹿殆將終身

國朝順治浙撫蕭公薦人才乙未補順天府司理輦轂殷煩刑名所關大書冰心鐵面四字於門一切請託槩行謝絕終以此見迂於時丙申大計致仕歸未逾年卒子嗣芳廣東市舶提舉有廉能聲

馬鎮字又范號地侯父志豪著聲縫掖能詩能琴兼

能書地侯生而丰神軒舉讀書務大畧案頭部署
縹帙展卷誦一過卽已不耐苦吟少年爲文握筆
數千言如旋風驟雨不可止遏晚而引繩就矩刊
落英華辛卯雋賢書困公車二十載居鄉砥礪廉
隅矯矯自好喜爲人排難解紛卽會議公庭鄉先
達群聚相視未發從中數言而自決其坦直類如
此庚戌謁選得龍南邑居萬山之中政清訟簡偶
有讞決兩造具陳如家人父子諭以情理曲爲解
釋署中無事日惟飲酒賦詩以自娛在任九載省

會大僚槩不往謁卽郡守僅視事時一見而已甲
寅尚之信叛應吳三桂贛屬邑盡沒於賊惟龍南
獨完亦不以此覲守城功丁巳陞內閣中書舍人
歸家僦居始豐壬戌入都候補以疾卒于途年六
十所著有寄眉草南埜集

贊曰起霞孤標絕俗如斷山絕巘不可以邪徑
造焉語曰黃河一直青松萬仞公其有之地侯
矯矯人群少年嶄然見頭角一行作吏絕不以
有所表見爲長亦異於世之嗶啾嚙如脂如

韋者矣

孝友傳

三國吳鄧盧叙章安處士弟犯公憲自殺乞代

會稽典錄

已詳見黃他下濮陽興復問朱育曰御史所云既聞矣書佐甯有識之乎育因引虞翔等及盧叙云

後唐賀瑄明宗長興二年八月一日其父朔漁於海

而溺死瑄姊英如華如號泣江澣求父屍不得欲

投江人止之越五日並投而死時瑄年十三追至

三山巖下見所躡履四日吾二姊逝矣亦投於江

山去其父所溺死所三百餘里次日二姊一弟抱

父屍而浮至巖下鄉人哀而異之為收葬焉

孝友

贊曰鄧盧叙賀瑄皆死於孝友者也豈非天性之有過人乎孟子曰所欲有甚於生所惡有甚於死彼號稱讀聖賢書者曾是之不若何哉

宋陳彝行字清臣公輔先生子也紹興五年進士徽猷公蹇諤不阿時俗宰相啖以柄用冀其少徇清臣聞之獻書於其父曰日暮途窮倒行逆施事之萬不可者也功名付之天數行已操之在我稍有瞻顧則平生名節掃地盡矣父感其言遂以鯁直終人以此賢清臣後官終監南嶽廟

謝敷經字子暢上蔡先生裔孫師事朱晦菴登乾道八年進士授信州永豐尉爲趙忠定所知忠定南遷以沒公淡然無復仕宦意家貧無以爲給易妻奩資買斥鹵棄地墾成隴畝力耕以食效范文正公立義田以贍其兄弟及族人又買官山以葬無歸者著家儀以詔子姓及沒二子郵郵以孝友聞贊曰陳清臣以道事其親者也父有爭子則不陷於不義孝莫大焉易曰有子考無咎其此之謂歟謝子暢法范文正公立義田復著家儀以

詔後其得力於考亭者深乎

元阮祖立字立道父患錮疾竭誠醫禱與其婦躬為
浣滷扶持坐臥者二十年一夕隣家火父不能起
立道負之出疾呼其婦挾姑以從比出門則家已
灰矣乃僦居僧舍供養無缺至正中詔旌其門
贊曰身不行道不行於妻子阮立道竭力事父
久而不懈平日之化行門內者深矣臨危之際
俾妻孥咸能挾其母以偕行賢矣哉

明趙孝先名次起以字行洪武初為國子生其父戊

京師孝先告祭酒以願代狀不許哭訴於禮部事
聞詔許之孝先喜不自勝即變服以行孝先素有
才望士大夫競為詩以送其行方遜志先生序之
曰士之學以善俗化民為本孝先一舉使天下咸
濯磨奮發為子則孝為臣則忠其有益於人紀豈
不甚大哉滿仕終寶坻教諭今祀鄉賢祠

危貞昉字孟陽通周易兼善於詩性剛方遇人患難
蹈湯火赴援不為利害計每讀古人忠孝傳輒感
慨慕倣其父孝先洪武四年辛亥進士為陵川丞

坐法謫役江浦孟暘時爲郡諸生聞之奔訴於郡
守願代父役守難之孟暘遂號於庭曰人孰無父
哉守感動爲聽其行卽日上道詣京師伏闕上疏
曰臣父陵川丞孝先不幸絳吏議輸作大江之濱
筋力向衰不能執事而大母范氏春秋復踰九旬
旦旦念之恐染霜露之疾無以遂其菽水之忱臣
犬馬之齒方殷願代父役使其歸養卽死無恨疏
奏太祖惻然從之孟暘遂易儒衣欣然就役然質
體羸弱不勝負任之苦越七月病卒時年二十八

今祀鄉賢其弟國學生泰生扶其柩歸葬請傳於
太史公宋景濂方遜志先生爲文送泰生歸有曰
人處平世父子相聚於一堂之上朝夕焉以問其
飽饑寒暑薦其歡而解其戚此生民之幸者以方
乎孟暘遭罹患苦以死固爲不幸也然今人得此
者亦有矣而雜然而生寂然而死求其獲書於鄉
胥閭史者且不能致况列於史官今孟暘不謂之
不幸然則泰生勿以深悲也其見慰如此
林惟深字思源資性純明與人論事剖析曲當情理

洪武初其父法當戍白於官代父以行王原采張廷璧深加歎服謂思源當與方希直並駕特所少者學問爾今日之去吾輩又失一良友也

何綱字維常以明經永樂初遇誣搆大獄其父亦逮繫于京維常侍行曲意慰安旣而誣伏論法應死維常哭泣悲慟哀懇于朝得謫景州居無何竭力謀免父歸歸而喪明維常扶持調護不離左右久而益力後貢入太學六館之士聞其名咸推重之贊曰趙孝先危孟暘皆名列宮牆身代父役其

講於身體髮膚之義明矣孟暘卒以戍終可哀也夫然皆得正學先生表揚二人者至今均不死矣林思源繼起俾王原采諸公比之方希直抑何偉耶何維常依依孺慕誠動人至免父于刑詩曰夙興夜寐無忝爾所生諸君子有焉

馮銀字純端景泰庚午薦於鄉性至孝父卒哀毀逾常事母竭誠盡養登天順丁丑進士授刑部廣西司主事以明允稱平生更篤於友愛攜季弟沉習學京邸朝夕引掖卒賴成名天順三年以母老由

員外郎乞歸省詔許之黎涪楊守勤諸公祖帳青
門外賦詩贈別一時以爲榮明年補刑曹時袁彬
方受上寵以事屬公公執法不阿彬銜之公曰直
道三黜吾固甘之然有母在柰何以身履虎尾遂
解綬歸橐無餘資竭力以供滫瀡暇卽與族之父
兄弟弟飲酒賦詩足跡不入城市弟沉字瑩端性
亦至孝成化乙酉薦於鄉壬辰登進士授宿松令
嫻於吏治得士民心以母艱歸號慟過禮服闋遂
不起兄弟咸志切色養芥視功名人並稱之宿松

感其遺愛祀各宦事蹟載安慶志中

陳紀字德廉號樗散性至孝居父喪晝夜悲號一室
苦塊煢然因得疾其內人令小婢餽藥叱而出之
旣祥且禫猶疏食水飲人勸以卮酒淚下潛然及
喪母廬墓三年寒不裘暑不蓋天順己卯領鄉薦
屢上春官通判甯國府清節凜然民有易子以輸
柴薪者聞而亟反之俾贖其子致政歸行李蕭然
父老攀留贖以金帛賦詩却之道經安吉有盜過
其舟曰廉吏也弗犯而去抵家杜門謝絕世故者

二十年郡守陳相欲屈致不可得卒年七十二所
著有通鑑測義朱子感興詩考訂顏子始末觀物
圖樗散稿

陳垣字子崇號一厓炫仲子也性資穎異童時喪父
哀毀如成人既終喪母令入庠校泣涕願侍養母
責以應繼父志乃始攻舉子業宏治壬子領鄉薦
授涇縣教諭以行誼廉耻率諸生士心悅服轉國
子助教甫三載當道論薦例得臺諫以母老願就
閑秩擢汝南長史居無何上疏乞歸養王再三論

留乞歸益力王深悉公孝行諭公以考績請封可
以悅母氏乃弗果歸已而憂念成疾既革諄諄語
曰我不孝我不孝卒年五十有四平生襟宇恢廓
善吟咏與物至和而堅貞之操確不可拔勢利紛
華泊如也今祀鄉賢祠

趙淵字宏道號竹江夢鶴翁璧之子也正德戊辰進
士授行人以親老請教職便養弗許隨告侍親數
載復任未幾使湖湘便道歸省適母蔣疾革人皆
謂公孝思所致非偶然者居喪極哀服闋稱疾不

起累陞司正部檄兩至始就職僅五十日擢四川
按察僉事改督貴州學遷雲南參議上章乞歸養
當道疏留轉江南提學副使首興白鹿書院教勗
諸生補四川參政兩疏乞休弗允乃復之蜀未期
翁訃至卽日奔還擗踊屢絕奉柩歸涇山逾年始
歸服闋薦剡日至終莫之起處異母弟曲意取歡
撫孤姪恩意尤至蚤崇名節攻文辭晚聞濂洛之
教益自振拔其飭行省躬虛已求益之心方進未
已年僅五十有五而卒卒之日正衣端坐惺惺不

亂識者謂足覘所學云其叅蜀藩時嘗啟蜀王建
方正學祠初宋潛溪容葬於夔其墓東有曠壤卽
建於其側以見師生之緒越蜀幽明之遇若天使
之然者此又公之積誠以妥忠義之靈有若此今
祀鄉賢祠

贊曰四君子篤孝天性醇謹至誠其皆得諸天
充諸養者乎純端瑩端志在養親爵祿均不足
動其志其以疏廣之操脩石建之職者歟陳德
廉潔身清介白華之義也循彼南陔一崖有焉

陟屺傷懷至死不變其情尤足哀矣趙竹江教
 洽南士績著川藩更與金一所共叙台學源流
 賈志而沒理學事功均堪不朽而一所公編邑
 乘列之孝友豈非先其所重者哉孔門四科德
 行爲先乃知政事文章之不可恃也久矣

蔡大治字朝佐幼從趙竹江游博通經史久困名場
 老應鄉闈未售性至孝父母俱染錮疾家貧子身
 傭書館穀以供甘旨妻辟纊以助不給躬侍湯藥
 扶起居澣滌廁禴備極艱辛二十年如一日父母

先後卒蔬水骨立寢苦哀慕所居軒有石榴花皆
 變白色人咸謂其孝感所致郡舉孝行三臺咸爲
 表宅名登憲綱賜粟帛年九十餘終於家

戴謙字景霞嘉靖癸未進士時弁孫爲諸生博綜群
 籍學有淵源嘗手編經史子集數十卷有條有貫
 事詳理密覃思洙泗濂洛之源作大學八條目解
 爲後進津梁門下士受其薰陶者卓然名家當道
 爭延爲弟子師天性孝友雁行四人公居三分甘
 同旨棣萼聯輝伯與季早世撫其遺孤唐臣唐相

解推衣食課以一經皆成立著聲庠序仲無子晚年纏綿錮疾則迎養於家躬親浣滷率子弟供湯藥終其餘年生平端重自好行規言矩子三人皆荀陳麟角長公唐獻另有傳次唐徵庠生有學行幼唐徹號可均性至孝十歲喪母擗踊如成人以時日不利含殮輒大慟日縱陰陽相尅甯有母尅子乎卒視殮如禮入邑庠試輒高等爲學使洪亭九及鄒嘉生所識拔年踰七旬猶手不釋卷嫡孫慶華慶章多繩武之彥

王士業字建叔號乾齋襄裕公少子性至孝淡於功名念父暨鄧太淑人春秋高諸昆戚食祿王朝終身願依子舍舞斑色養以任子授詹事府主簿矢志不出部檄敦催始赴職居官清慎勤敏有聲稱天啟辛卯陞郡司馬聞父訃立出都門據鞍星馳五易其馬十八日卽抵家腓肉騎復見骨血透重茵脫韉時不自覺也躡踊號絕週一夜方甦寢食不離靈右及葬廬墓三年哀毀骨立竟終於墓側子立埤字伯彤文學生亦以至孝聞

贊曰李陶戚而烏烏成墳劉殷悲而霜莖滿地
蔡朝佐孝通神明庭花爲之易色誰謂古今人
不相及哉戴景霞兄弟子姓怡怡恂恂天性自
然一經相砥礪益令人思陳仲弓矣王建叔奔
訃星馳望鄉踊絕竟以毀傷非至孝能若是乎
洪夢岐字德鳳號養冲裔出宋大理評事敏扈駕南
渡紹興四年始遷居邑之三江生紹定進士應龍
十三傳至公爲郡諸生萬厯初年張江陵柄政沙
汰青衿郡庠八學八人公居首博該經史性至孝

父早世撫弟三人成立人鬻序待諸侄鈔鐘銘輩
如已子家饒裕慷慨好施父所遺貲產分諸弟外
餘悉以散濟貧乏人或假貸不能償言及鬻妻
子輒焚其券卽有力能償托言鬻妻子以冀免亦
不計也課田租入必以小斛平以概凡交易銀必
用足紋官兌較台戥重加一天啓間歲連稔每年
傾囊賑貸人貧槩不能償盡還其券家亦以是驟
貧爲人端方莊嚴家門肅穆繩子姓以禮秩然無
敢譁年八十有三終於家凡隣里莊佃經紀人間

之者無不流涕子日慶天慶以孝友世其家

皇清洪日慶字初明號監茲生未週卽喪母王氏事
父暨繼母最孝與異母弟天慶友愛逾常每聞人
言及所生母卽嗚咽流涕自兒時已然蓋其天性
也長而爲邑弟子員博學能文於書無所不讀受
知監司張師繹守劉夢松令張崇德咸以國士期
之適公喪偶周氏暫殯郊外蔡嶺爲盜所發罄剝
所殮物當道聞之震怒立檄邑令齎刑具親至殯
所收捕地隣百餘人窮訊之父語公曰開棺重律

人誰肯吐實汝以伉儷故累及多人嚴刑之下尙
有屈招其何以安公卽向邑令述父意求釋且言
情願割痛屈法以無累地方聞者咸嘆惜謂父真
仁人子真孝子也父有疾嘗藥侍寢衣不解帶親
滌廁禴旣卒寢苦塊哀毀骨立葬復廬墓三年而
後反室力行古禮爲近世所未有爲文原本程朱
剖旨析微不習因襲剽竊之態明末文習誕詭屢
試棘闈不售家益落一經教子孜孜不倦後進推
重屢膺鄉飲閭里以爲真無媿大賓子七人俱以

文學起家若臯登乙未進士

封戶部湖廣司郎中如子官卒年八十有七祀鄉賢

祠見省志孝義傳

贊曰財有不必積而裕於後者詩書之澤也名
有不必邀而自彰者德之流也賢而多財則損
其志愚而多財則益其過養冲公審之矣詩云
孝子不匱永錫爾類封公有焉

臨海縣志卷之八

臨海縣志卷之九

候補按察使司僉事邑人洪若臯編輯

同邑舉貢庠生分纂

人物志三

文苑傳

三國吳虞翔仕吳為鄱陽太守博學善詞章更工於
文檄時句章任奕官御史中丞能古文詞常著任
子十卷山陰朱育稱翔與奕立言燦盛擘若春榮
晉任顒字平子有才學為司徒王導所辟導每宴客

必人加讚美至顯則曰自君出臨海不復有人矣
 贊曰文章國之鬚眉吾邑三台孕秀雙幘鍾祥
 虞鄱陽其文章之先幟乎惜其著作不垂僅以
 文人隻辭稱許見傳於後世任平子徘徊相邸
 比肩名輩得接齒牙餘芬亦可謂彬彬爾雅矣
 唐項斯字子遷未第時以詩謁祭酒楊敬之敬之贈
 詩云幾度見詩詩盡好及觀標格過於詩平生不
 解藏人善到處逢人說項斯由是詩名徧達長安
 明年會昌二年登進士上第始水部張籍為律格

詩惟朱慶餘親受其旨既而任蕃陳標章孝標司
 空圖咸及門焉寶歷開成之際子遷尤為水部所
 知聲價特甚故其詩格與之相類官終丹徒縣尉
 有會昌丹徒尉詩集一卷行世張洎序之

浙名賢錄俱稱斯臨海人張洎集稱江東人誤

按一統志及兩

贊曰張為唐詩主客圖有云清奇雅正升堂項
 斯吾邑巖深壑險人文因之詩學一脉聲律出
 自性靈咸具有張文昌之派者當知所自來矣

宋楊蟠字公濟慶歷六年進士善詩生平所為數千

首歷和密二州推官通判杭州嘗作錢塘百詠詩
 時蘓子瞻知杭輒與唱酬歐陽脩讀其集有詩云
 蘓梅久作黃泉客我亦今為白髮翁臥讀楊蟠一
 千首乞渠秋月與秋風王安石有答公濟書曰讀
 足下之文但知畏之願造所聞其見重於名輩如
 此後知壽州提點荆廣鑄錢卒所著有章安集
 陳貽序字叔彝貽範之弟登治平元年進士性剛介
 有才學以詩名為蘓東坡曾南豐所知官終奉議
 郎湖南運判所著有天台集子克見忠義傳

陳師恭貽範之子博古有文行中入行科進士嘗著
 日記以書時事呂師囊之變尸曹滕膺戰守有功
 讓於郡丞李景淵朝廷因進丞為守吏官亦據所
 上狀紀丞功郡人不平慶元初郡守周擘始白其
 功請於朝立義靈廟祀膺朱文公即按師恭日記
 為記稱台之文獻足徵可破史籍侵誣之論

王卿月字清叔博學丁古文詞不隨時好力追古雅
 性穎悟多藝能雖音律卜筮無不貫徹初中乾道
 二年武進士復登五年文進士仕秘書郎嘗權中

書舍人直學士院掌制詔所草詞百餘篇不畏勢
不避嫌不脩怨亦不飾美以市恩深得代言之體
時秦檜當國王和議胡銓忤檜貶官清叔草制云
吾甯身蹈東海獨仲連不肯帝秦至今名重泰山
微相如何以存趙時論多之歷官太府寺丞假吏
部尚書充金國生辰使未行除太府卿以疾卒自
號醒菴居士所著有醒菴集

朱玠字寶臣元豐五年進士博學有才名文詞藻麗
一時諸公碑志多出其手官終棣州防禦判官贈

正議大夫有朱氏易行于世子緯政和二年進士
朱斐字知裁年十二預鄉薦建炎二年進士仕終大
理少卿所著有燕石集

李庚字子長紹興十五年進士歷監察御史終知袁
州聚書萬卷所著有詒癡符

張布字伯勇乾道八年進士歷太學錄樞密院編修
遷秘書院丞終朝散大夫所著有六經講解

王滋字次卿嘗有尚書藁論語說紹熙五年以上舍
釋褐授嘉興教授改楚州其爲文引物聯類切于

事情而旁推曲究歸之正理

樓觀字子頤涪熙十四年進士歷太學正秘書丞終大理少卿善屬文規局宏正不作奇怪語兄覺紹興五年登極恩官至婺州教授時號二樓

葉皆字孟我慶元二年特科終甯國王簿所著有易解考工記辯疑

陳耆卿字壽老號篔窗嘉定七年進士官至國子司業吳明輔稱其文遠參洙泗近探伊洛沉涵淵微恢拓廣大周旋賈馬韓柳歐蘇間疆場甚寬而步

武甚正也葉水心見之驚詫爲序其所作以爲學游揚而文張晁水心旣沒篔窗之文遂巋然爲世宗蓋其統緒正而氣脈厚也所著有論孟紀蒙篔窗集赤城志今祀鄉賢祠

吳子良字明輔號荆溪寶慶二年進士官至湖南運使太府少卿幼從陳篔窗遊年二十四登葉水心之門水心稱其文意特新語特工韻趣特高遠雖昔之妙齡秀質終以文名世老不過若是何止超越流輩而已哉及卒車玉峯挽以詩有云江右文

章今四葉水心氣脈近三台所著有荆溪集

林表民字逢吉父詠道號竹邨居士好古博雅儲書甚富逢吉承其家學而與陳篋窗吳荆溪遊嘗同篋窗修赤城志又自修續志三志及輯赤城集二十八卷今書俱亡

鄭大惠字簡子清苦善詩蕭然一室公卿貴人與友弗願也

徐韶字君美學於王蘊文嘗著正朔郊祀禘祫辯及春秋精義學者尙之

范筌字叔魯從朱晦菴遊嘗築小軒靜坐其中潛心理學居鄉授業操履端嚴人稱勿菴先生

高耕字志伊其先觀察使棟從高宗南渡居臨海詩文意不拔俗語不驚人不已也晚歲益奇自號天逸所著有帶金集

湯緒號樵石省試第一博學能詩至元不仕有樵石稿

贊曰宋時詞章之盛凡十有九人楊公濟王清叔陳篋窗吳荆溪林逢吉皆所稱白眉者也清

叔絲綸之手不激不隨其知言乎陳眉公秘笈
集荆溪林下偶談闕其姓里乃不知吾邑之產
豈不可惜哉其餘或見譽于各流或潛心于經
史或著述遺文以自表見皆彬彬有文學之風
焉

元楊敬德字仲禮仕翰林編修轉浙江提舉能詩常
修赤城元統志今書亡仲禮自爲序見藝文志
林暉字伯昇號竹雪能詩官至戶部侍郎嘗奉使閩
中有懷兄詩見藝文志

黃庚字星甫號月屋善吟詠所著有月屋樵吟
于演字佩遠號善初工於詩有虛舟集

楊大中博學洽聞仕元爲著作郎明洪武中召見留
文淵閣數月以老躋歸所著有赤城志及隨手錄
三十卷

舒卓善屬文至正辛卯鄉試左榜宋潛溪稱金華趙
友桂有文才豪放自高每讀人文章一二語弗契
輒覆手掩几上視雲漢作他語獨善舒卓卓至夜
談屢及旦飯至且辯且食入咽不計多寡輒棄去

及卓去沿道刺刺不休逢舊館人揖有目不見是
雖友桂之任放亦足見舒之文爲所深服云

贊曰元文苑六人值離之晨咸高蹈幽棲潛心
經史者居多卽楊仲禮林伯昇皆有國爵屏貴
家人忘貧之風或吟詠自娛或著述表見池隍
雖浪璇玉自異園林雖茂椒蘭信芳故曰無足
而至者物之藉也隨踵而立者操之薄也文章
亦視乎其人而已

明朱右字伯賢嘗遊李五峯陳兩峯之門與宋太史

景濂爲友洪武初預脩元史大明日歷皇明寶訓
授翰林脩撰篤於文章與方正學往復論辨最相
洽景濂每稱其有良史之才嘗以歐陽脩脩唐史
譏李泌好縱橫大言以鬼道媚天子取宰相乃作
李泌傳以攻歐陽之謬景濂讀而喜曰微朱君泌
不銜冤於九泉之下哉歷晉府右長史卒所著有
白雲稿春秋類編三史鈞元秦漢文衡深衣考誤
歷代統紀要覽元史補遺

陶宗儀字九成號南邨博學宏覽少年舉進士不第

卽棄去專務古文詞尤精字學性度冲粹接人以誠平居寡言笑至論古今人物上下數千年竟日不倦至正間浙帥秦不華辟行人不就遂避地江之亭林力耕自食教授門徒張士誠據蘓擬署軍容堅辭不往洪武六年舉人才至京以疾辭或讓之嘆曰今賢良輩出草莽之臣老死太平幸矣踰分之榮其敢覬乎有田一廛家于松南所藝菓蔬薯藥量給賓客餘地悉種菊嘗休於樹陰下有所得摘葉書之貯一破盎去則埋樹下累盎至十

數啟而編次成書如是者十載間遇勝日引觴獨酌花前歌自所爲詩陶然永日嘗自序洪武二十年丙子率諸生赴禮部考試讀大誥賜鈔歸終不受官晚年尤好著述世所共傳者說郛一百卷輟耕錄二十卷書史會要九卷四書備遺二卷卒于建文時

陶宗儒一名宗誼字漢生宗儀之弟洪武時官禮部員外郎與會稽陶肅上虞謝肅等一十九人以詩名于時號稱皇明雅頌

贊曰朱伯賢華國逸才著述宏多更以良史見
推潛溪與雕章繪采者殊矣陶九成涵今茹古
白日林泉浮雲軒冕咸謂靖節再生乃說郭一
書織錦天孫嘉惠後學人傳壁中蝌蚪之文家
誦玉杯繁露之什抑何奇也况長途二龍文章
更聚於一門哉

林公輔名右以字行與方正學王原采爲友洪武初
任王府教授爲人氣高而才敏於人鮮所推讓文
章喜馳騁好談古今豪傑事父因事充軍乞代父

役役滿復其原官人皆賢之方正學嘗與甯海郭
士淵書言得公輔文展而讀之其思淵以長其辭
辨以達不覺叩几三嘆反覆玩繹信乎吾郡之秀
不可及也又嘗與公輔書云百餘年來士大夫學
術卑陋駁雜不復知聖賢成已正心之大苟焉以
釣名取寵僕誠欲掃末流之弊復先聖之軌獨行
而莫與之徒於此之時而求可以共進於斯道者
非足下將安望哉所恃者吾與足下皆未老制於
人而不得爲者吾莫如之何由乎我而人莫之制

者勉而終業必有所可望一其心而定其志遠其期而後其獲不有得於人將有得於天不有取於今將有益於後其期望如此所著有林公輔集張廷璧以字行名穀號古學穎悟絕倫工草書善詩文洪武中舉賢良方正授河南太倉訓導改仙居方正學嘗與之論詩曰足下之詩刻峭森秀其辭信奇矣然古人之道雖不專主於爲詩而其發之於言未嘗不當乎道是以雅頌之辭烜赫若日月雄厲若雷霆變化若鬼神涵蓄同覆載誦其詩也

不見其辭而惟見其理不知其言之可喜惟覺其味之無窮今天下學者靡靡焉陰竊陽剽以爲能詩欲其知所趨向由大路而不失馳驅之正者非足下誰與歸焉永樂初校帖翰林應二十八宿之選未幾同進者皆授中書舍人廷璧以歸省不預卒於家所著有張古學文集今祀鄉賢

趙文象字伯欽洪武初入太學博學工詩文時方遜志在甯海伯欽數以書相聞問正學嘗與書云僕求友於四方十餘年於同郡得一人焉曰林公輔

公輔氣高視人行行然有不滿之色前與僕書獨稱足下文已知足下非流俗人可及近入臨海見公輔公輔說足下尤詳公輔之友張廷璧不相見者七八年其人奇偉不肯苟伏人至語及足下則稱善因二子而求足下之所造固已心傾之久矣今乃承惠書論甚大辭甚達卓乎有曠視前古之意反覆覽繹嘉二子之確於取人喜吾黨之士果有足望喜發於中如獲大呂九鼎而載以歸也又曰自足下別去屢辱枉問欲裁荅而居處僻左念

雖寄書必不能達又意足下在太學與天下英俊相講切者如林僕縱欲有言豈能出足下聞見之外哉以是執筆伸帑而復棄去者數矣近復承書懇懇然以弗獲相與問學爲嘆顧僕豈其人哉僕於人事都不通獨古聖賢之書則若與已意合每觀古人道德事功之盛慙悔攻中若無所自容以是深自懲劓凡舊時夸詞游辨亟毀棄之默坐一室溫習四書五經求其微指之所在察諸身心而驗於事爲蓋欲自致於寡過之途而未知其當焉

否也足下以卓越奇毅之才志之所向何所不達
然所宜慎者毋蹈僕之所悔以求古人學術之大
全耳

贊曰洪武壬戌秋方正學先生過郡城偕林公
輔張廷璧暨葉彝仲陳元采諸君夜登巾子山
飲酒望月縱談千古因嘆以爲蘓子瞻死後三
百年無此樂諸君相與極歡而散一時名賢聚
集推誠投分觀其與林張二公筆札聞問勉善
規過真君子之交乎當正學在金華別潛溪歸

甯海時潛溪贈詩五十四韻且曰後二十餘年
當信予爲知言正學從未出以示人特錄寄與
趙伯欽知其與伯欽深矣

葉恩字孟德永樂庚子薦於鄉甲辰會試第一授刑
部主事陞池州知府生平嗜學手不釋書至不知
饑渴寒暑性更穎悟過人舉日究旨終身不忘制
舉藝高華曠遠兼工于古文辭所著有恥齋集今
祀鄉賢子廷榮成化進士見宦業傳

陳公綸字渙中號古臺好古博學善爲五言律清新

婉摯嘗自號天台玉室道人所著有采碧集其自序以爲本東野農夫因徙郡城誦讀爲章縫行跡不出其鄉獨六客錢塘平生好詩歌恥趨謁自禁諛語以玉室名其詩不欲著其姓字云吳門錢謙益錄其詩於列朝詩集

蔡宗堯字中父博古能詩自號東郭子嘉靖丁酉舉于鄉司教松溪松溪諸生刻其文二十卷樂府一卷曰龜陵集錢牧齋謂其多識古文奇字詰曲取裁殆亦圭峯之流亞出於嘉靖中年知其蔑視李

王矣屈首青壇世不知其名氏可感也仕終當塗知縣詩見列朝詩集

贊曰葉孟德敏而好學輒以文獲報耕而獲菑而畬其庶幾乎吾邑僻處山陬科名之外聲施不出於閭里陳子以章縫而垂稱翰苑席上之珍潛而彌彰誠足重也蔡中父河汾續述壇壝奉爲著蔡畦徑岸異不屑奴隸於時流非有過人之資能若是耶

陳錫字元之號南衡性機警宏通該博凡天官堪輿

醫卜星相陰陽等書無勿精究嘉靖己酉薦于鄉
上春官不利卒業成均司成以五經疑義課考抉
微訂奧剖晰源流司成嘆服丙辰成進士殿試卷
擬第一世祖訝其直言時事置爲二甲首時嚴嵩
讀卷覲其出門下勿往謝嵩銜之授禮部祠祭司
主事丁憂服闋補前職會日食尚書吳公令受牒
視日食狀時陰雲莫辨嵩方以當食不食奏稱賀
公從實報日食分數嵩大怒嗣因早考察被脩郤
罷官歸益杜門著書嘗作易原辨陰陽象數之指

証以古今事變識者謂遠過焦氏易林善賦詩卽
席分韻數百言刻燭而成晚著有楮瘦集卒于家
今祀鄉賢孫學章萬歷丙辰進士仕彌勒知州有
賢能聲

王士性字恆叔號太初爲諸生讀書過目成誦性磊
落不羣不治生產家甚貧隆慶己巳學使林按台
首拔異等以天下士目之旣而游學武林嘗以天
地之英華不能鬱闕而不宣之物而爲山川之人
而爲文章由是慕尚子平爲人有小天下狹九州

之槩作爲詩文幽深峻削孤情獨往萬歷癸酉篤
賢書上春官不第遂入金華山東南行二百里至
仙都經年而返丁丑成進士戊寅赴確山任過臨
安曰余居恆數心泉石幾欲考卜湖畔良緣未偶
今捧檄朗陵念走風塵未卜再遊何日遂徧游武
林作湖山六記旣蒞政持大體不屑屑細務夙駕
星分著心人外辛巳秩滿例得代篆上閤閱遂由
宛入洛取道登封遊嵩高旋歷中州行二千三百
里盡得其勝丙陞禮科給事中建言漕河水利諸

疏極切時弊乙酉丁母憂丙戌苦塊中慨然曰南
海之墟有二越焉於越當其北甌越當其南生長
台蕩席其山川而山川不知可乎於是入四明渡
海登補陀轉姚江出曹娥走鑑湖上禹穴旣而渡
錢塘下桐廬過嚴陵入蘭溪復東南至永嘉由樂
清遊雁蕩而歸仍入天台山結廬於華頂桃源之
麓明年以爲三吳南龍之委也其奇秀甲天下與
二越稱不可不以次舉復發天台過胥江登虎邱
八太湖眺金焦北固三山至金陵九華山自白岳

而返戊子服闋北上駐帆濟甯趨曲阜觀孔子廟
庭遂由泰安登岱宗凡齊魯之名山川無不覽焉
入都給事禮垣以爲漢唐宋五陵曲江艮岳鷄鳴
牛首非百官賜湯沐之地耶今乃束於功令未敢
越宿出都門徒在笏而望西山爽氣人生幾何其
爲消阻精神也何限矣乃乘間而遊西山是年秋
奉命典試四川所經燕趙韓魏宋衛中山之墟無
不窮覽其名勝取道華陰遂登華岳出寶鷄渡渭
水入益門關試事畢登峩眉題名於天門石間道

而西復游恒岳聞命轉廣西參議遂自蜀入粵道
經衡陽復游衡岳於是五岳徧歷矣皆天之假公
時與地與官以畢公志自是由粵藩轉滇臬副使
己丑赴粵則有太和山廬山楚江諸記己丑蒞粵
則有桂海志七星巖獨秀山訾家洲諸記辛卯入
滇則有泛舟昆明池歷太華諸峯游九鼎山諸記
庚寅行部則有點蒼山鷄足山諸記公蓋無時不
游無地不游無官不游而文章卽於是燦焉耳癸
巳陞大理寺少卿乙未擢都察院右僉都御史巡

撫河南例不當辭而公力辭遂改南鴻臚寺正卿
公意氣凌霄一官爲寄天下九州履其入所未到
者聞耳諸名山自五岳而外窮幽極險凡一巖一
洞一草一木之微無不精訂他若堪輿所述象胥
所隸千名百種無不羅而致之筆札之間有五岳
游記十二卷廣游志二卷行世析津楊體元又刻
其佚稿廣志釋六卷於武林公卒於萬歷戊戌年
五十有二今祀鄉賢子立轂字紫芝中萬歷丙午
鄉試授新淦令見對簿冤號遂解組歸終太夫人

養卽祝髮於西湖禪林忽一日焚沐作偈召徒衆
示以去來趺坐而逝喬梓蓋皆烟霞中人歟

贊曰昔人謂臺閣之文氣雄以麗有異於仰屋
梁而攢眉者南衡璠璣重價揚聲鳳闕昂霄之
姿短鬪時相璞而愈光何傷焉以恆叔之才黼
黻廊廟璇玉綴而韶鈞懸其爲國華也大矣乃
滿腹瑯玕徜徉謝屐雕肝琢腎於烟雲巖壑之
際然文章與五嶽同垂天之報之者已不薄耳

馮繩祖字武甫號琴山運使學易孫庠生元鼎長子

元鼎性至孝少有文名三十而卒運使傷之亦亡
時繩祖年十歲弟繼祖字起甫纔七歲兄弟皆力
學能詩文唱和于一堂之上聲稱籍甚已而弟亦
早世公撫其遺孤篤於已子躬課咕嗶凡門戶糧
役皆身任之事母陳氏善承歡朝夕葬父與弟克
襄大事性忼慨不善謀生顧篤好詩文兼工米南
宮書法晚年不得志縱飲長歌雖爨烟屢斷不之
顧卒年四十一所著有窺園草蛙鳴琴山雜咏諸
書元鼎所著有缶鳴編母陳氏有繡佛齋草起甫

公以子甦貴贈徵江知府著有寒吟錄人謂馮氏
世有文名云

戴唐獻字伯言又字十夫記問該博爲文銜華佩實
茹古吐今每試輒高等弱冠與陳寒山戴岷人分
茅設菴齊轡爭驅寒山成進士去二戴聲名斗杓
一時學者奉爲祭酒河汾講席並施都人士有大
小戴之目大戴謂公小戴謂岷人也岷人巖巖清
峙人多憚之公謙懷雅度和易近人然稍涉非理
則義形於色所居左右圖史尤喜汲引時俊執經

問字有一言幾於道卽廣稱延譽不置口屢應賓
興卒踈跋不一遇晚用歲資貢大廷非其志也越
數月遂以疾終所著有聽雨軒諸集藏於家

戴杏芳字君一號吧人後改名栢臨江守雙江公冢
孫生而秀峙玉立如野鶴孤標通達古史百家言
鑽幽嗜異鼠獄鷄碑無所不貫爲文輪菌離奇每
一下筆青霞素雯狎至穎端學使江右吳茲勉黎
博菴稱知人能得士咸拔置冠軍驚爲唐劉灣孫
樵再見持此應闡試其語多不可句主者束於功

令輒未售自負高不肯下人獨武林孝廉沈守正
無回有重名秉鐸丹崖往師事之賦性耿介畏塵
土事如仇家世宦業素清所有石田以讀書易去
遂至相如壁立晚年設絳帷於雙江公祠堂臯北
講學後進望祀如五緯經天芒寒正色所著尺牘
寸素人爭相藏弄當事耳其名有徵文者走筆應
之不在見見亦不干澤以是落落終其身明末以
歲資爲明經鬱鬱不得志沒冢子名匪斂字况生
幼聰慧絕倫年十四讀等身書酷好左氏口不停

吟爲文幽芳別艷不忝乃父公亡後一年亦卒公所著書已刻稿有儻草諸集未刻詩文散佚劉塚唐瓢渺不可問矣

贊曰馮琴山兄弟棣萼聯輝竹箭南金不得專擅於一陸然惠連玉樹早凋迄今讀寒吟一集豈所謂才而奇者造物固忌之耶大戴精五行家言嘗自知李廣不封兼懷伯道之慮鬱鬱終其身岷人有子析薪克荷乃喪顏回而天李觀天不報施善人夫亦以人壽者輕而文壽者重

歟

皇清何衡字無頗號峙湘明山東運同舜齡仲子幼補弟子員博極羣書工文詞試輒高等甯海任公大治仕南刑曹招致爲館甥翁壻皆以能詩名玉潤冰清賡歌窮六朝勝概嘗賦白燕詩數十首南中帑爲之貴隨父歷任山左閩中到處窮極山水以資益性靈下筆數千言每得江山之助同人社集領袖詞宗爲鷄壇祭酒與人霽月光風胸無城府對之者鄙吝消亡好客樂施贈遺每傾其橐滄

桑之會兵火相尋數椽盡付灰燼半菽未充履之
怡如也有子六人皆有聲庠序絃度壬辰進士官
王官屢迎養不赴曰吾兒冰蘖自持余不甘以輿
馬僕從累介節儉居城北山房與二三故舊徜徉
山水詩酒間不復知人世有快心皺眉事卒年七
十一所著有憶焚草客游集鰲江雜著朝野錄追
昔篇等稿藏于家

陳臣謙字六吉寒山先生長子爲諸生有文名受知
學使黃跨千黎博菴俱拔置冠軍崇禎乙亥雋明

經科應北闈未售省父靖江署中返棹過姑蘓傾
所攜金盡市書籍以還歸而鍵戶山房朝夕揣摩
痛自督策再躋名場滄桑之後盡棄舉子業作爲
詩歌鏗鏘鏗鏘不忝乃父家風壬辰卒于家年未
逾四十弟巽之字風人亦博學能文詩祖晚唐尖
新幽峭順治間歲貢未任卒

陳璜字元卿號琪園髫齡爲弟子員攻帖經兼治古
文詞見知於江右黎博菴爲人軒軒自負以能詩
稱浮沉場屋艱於一第然志久不衰揣摩日益力

中順治辛卯鄉試壬辰聯登進士戊戌授壽張知縣縣僻而簡戶口僅千餘署中菘瓜蔬以自給日手一編吟詠不輟丁未因小誤鑄級回籍數椽無棲布衣徒步郡邑罕所延接戊申補甯德丞甲寅遭耿逆之變鬱鬱不得志卒于閩年六十有七所著有寓園詩集文畧旅書琪樹園詩話

贊曰何時湘鼎食世家無悶閱裘馬之態霜鴻松雪文與品齊寒山有子二難並稱陳琪園自負五兵武庫糞澗章句儒生其清約足嘉矣

卓行傳

宋蔣至字造之有學行家居教授母張氏年八十鈔經典以助之大中祥符六年詔舉德行郡守章德象及部使者以名聞詔索所著經解以進授將仕郎本府助教賜其母帛慶歷大水城潰子孫挾之往避日死生命也吾何逃焉正中危坐而逝

陳守忠獻肅公良翰父也仕爲和州通判其配洪氏不育爲置一妾進房之夕襲衰於內扣之故濶州通判女父喪尚未除遂處以別室飭裝匿遣之

王璵字泰叔淳祐元年進士初爲山陰尉嘗忤榮邸
理宗以鐵漢稱之郡守趙子寅以爲從縉紳間聞
鐵尉未之識及領邑丹邱而後知爲泰叔自是定
交惟恐泰叔不我卽耳其骯髒類如此

楊起宗字振之卯角能文徧誦六經累試不就子嗣
參登嘉定進士振之以入官自學古始益課其讀
書講習以求律已治人之道朝夕不懈及嗣參尉
餘杭迎養在署書古語於門曰食淡精神爽官清
夢寐安嗣參後以清白聞

江仲明宣和間呂師囊之變負其母避山谷間猝遇
寇於東城之岡逼之降不屈遇害呂頤浩爲之誄
王榮咸淳進士珏之父也起家刀筆陰行善務以全
活人爲念嘗置一瓦罍於臥處每行一陰德事則
投一錢滿則更置之初無子一夕夢人以兩玉爲
謝因生子名珏見忠義傳

贊曰蔣造之其古碩儒之流乎觀和州之德而
知陳獻肅之有所承也王泰叔以鐵漢動人主
理宗善善而不能用大抵剛之一字非宋室所

臨海縣志 卷九
宜耳楊振之義方之教可爲仕者式江仲明豈
非死於孝哉至王叔寶赤心報國雙玉預兆於
積善之家乃知忠臣義士之生固不偶也已

元曹潤字宗澤性至孝父進卿爲委吏儀狀魁偉至
正二十七年方國珍既敗明師入城校卒疑進卿
爲賊黨執之家人逃竄莫顧宗澤冒白刃以身翼
父哀求辨白傾家貲與之乃始獲免子鼎登明永
樂二年進士官刑部員外贈如其子官

柯立善字遂卿時海寇竊發有司令能捕獲者爵賞
有差有鄉民二人同負米入城易錢若干縉出城
一舍惡少年利其所有追及械繫之誣爲盜一富
豪復賂少年掩爲已獲以邀賞遂卿熟識其中一
人爲張萬者毅然爲陳其狀於官訊得其情三人
獲免於死

陳世榮字茂卿號松隱處士嘗道遺鈔同行者欲
分之茂卿曰非義也訪其主乃妾史之婦易產以
贖夫罪者婦得鈔泣謝曰妾自分必死今更生矣
蔡積中篤志嗜學通易詩書少孤貧養祖父母以孝

聞會科舉廢授徒於其家危孝先張肩吾趙仲通輩皆出其門均以文行名於明初

贊曰曹宗澤翼父於難不顧其身克昌厥後官矣柯遂卿有古俠士之風陳茂卿深知利義之辨者故不以所輕易所重蔡積中爲西山後裔積學潛脩抑亦先儒之澤未斬耶

明李宗魯爲人侃侃自許不逐時流洪武時入太學囊無一金之儲處之怡如旣授監察御史宗魯不以顯榮介意一如其在太學時後以誣誤左遷王

瓜洲原粟終無得喪之繫泰然也方正學 生深

服其人嘗贈以文曰善觀璞者不觀其形而觀其色善觀人者不於其材而於其氣形可僞也色不可僞也材可強也氣不可強也譬之大海然百川之灌然後能萬斛之舟汗潢之水一葉加之則勝浮之以杯則沉矣故君子貴乎其養也又曰髮不足者夫髡則羞傷趾之人與履則憂彼皆不足於已者也今人之有得孟美而自慶者有一錢而移怒於妻子者彼非不欲強飾其情內無足恃

雖欲僞爲而不能也布衣之於御史御史之於
粟吏其得失亦遠矣宗魯皆不爲少變豈非內有
所恃乎人苟以其外者視宗魯非知宗 者也

贊曰功名之於人甚矣哉世豈無忍耻蒙垢以
保富貴者究沒沒無聞而李宗魯獨以罷御史
傳是御史果足榮辱人否耶觀正學先生之言
人亦可以知所輕重矣

趙次進字孝禮洪武二十九年丙子領鄉薦與鄭華
同榜建文末爲無錫縣丞鄭華爲東平幕燕兵起

托疾尋醫寄妻子於孝禮署中永樂時歷布政司
參政陞太僕寺卿出守滁州先是庚子仁宗監國
被召赴北京過滁登瑯琊山問醉翁亭但見寒蕪
荒址惟醉翁亭及二賢堂六字隱隱巖石間顧其
從臣曰邦先賢之跡棄不治如是其政可知矣太
息去之後六年孝禮到罄捐私橐新創其亭亭後
建二賢祠祀宋滁守王元之暨歐陽脩百費不需
於民滁人德之宣德元年楊士奇爲記稱其愷悌
明達所至爲所當爲云

任稜字孟廉號網菴天順間以經明行脩薦舉歷官國子學錄性友愛悉以先人遺產讓其弟博學能文章臨海舊未有志與周朝振創舉之嘉靖十八年余仲栗金一所重修賴有此本

侯卿字邦彥號抑菴仲璣次子天順歲貢平生尚節槩時收藏方正學先生遺文之禁未解莫敢裒集邦彥博求四方得姑蘓陳編脩鑑家藏遺文二百六十篇歸授友人趙廷節授梓邦彥亦由是多聲稱孫鳴號北崖博學能詩有祖風

趙洪字廷節景泰庚午薦于鄉任靖江教諭爲人好義有文學得侯邦彥所授方正學先生遺文復采集士大夫家之所記誦共詩文三百六十篇捐貲鉅梓以傳于世

贊曰四君子皆能脩明先賢之跡者邦彥廷節所爲極難也二公距藏方文之禁已六十年此時不輯則幾乎息矣後成化庚子甯令郭紳刻于甯海正德庚辰郡守顧璘刻于郡齋嘉靖辛酉學使范惟一重刻之華亭徐階爲之序皆歸

重趙教諭首事之功則廷節洵不可及也

陳琛字廷南逸菴弟也性孝友嗜學逸菴官京師以誣逮繫疾且殆廷南聞之奔赴京師王者嚴禁不得入廷南哭訴於獄門之外司寇聞之許侍湯藥備極勞勩因搆疾卒于都

馮詠字處夔隱居力學永樂間歲連饑里人王德章以重逋無償鬻妻子聞而貸之粟德章感激繪其像祀之江右鹽商有覆舟者窘迫求貸不留券與以五十金其好義樂施不特一二事也又嘗以佳

城讓弟其後子孫極盛

柴鑣字仲和號雪松篤志嗜學正德八年癸酉薦于鄉除榮陽學諭陞永春縣令興學校諸生感其德肖像以祀轉汀州通判皆有政聲迄歸養母以孝聞友愛其弟及從弟咸以所置田廬割而與之

陳寅字永慎號介軒旅之子好學篤行當道奏薦駙馬抗志不從常傾已囊助建緱城方正學先生祠宏治間貢授吳縣訓導改江西建昌端範廸教士于矜式陞教諭不就乞休歸養克敦孝道閭里稱

之所著有介軒集

楊泰字叔瞻號雙巖讀書敦孝行家素貧及入邑庠得廩餼竭誠色養母痼疾調藥物十餘年母卒愈父善圍棋與客對局輒勝一日屢北叔瞻退而憂愁不已未幾父果嬰疾不起叔瞻侍湯藥寢苦塊勞瘁哀戚逾數月亦終

楊瀾字東之爲諸生篤孝行父性嚴好客鷄黍無虛日東之視無形聽無聲極力營滌澹罔弗繼父後喪明左右扶持終其身勿敢懈撫諸弟妹恩有加

父喜謂諸子曰汝兄真孝子也一日置酒侍父忽遭寒疾卒人咸傷之

馮學經字綸卿郡弟子員有聲黌序早歲失怙與仲弟學易友愛怡怡共習舉子業旣而弟雋賢書益發憤自勵性至孝母卒哭泣躄踊不欲生及葬結廬墓側茹齋席藁朝夕哀號三年足跡不抵家久之墓上產芝草數莖有鹿馴擾其傍鄉曲奇之具鳴其事於當道學使伍公授司訓職銜獎之優游終其身一日偶疾謂家人曰明晨余將逝矣次早

整衣冠拜家廟端坐而卒年七十有八

贊曰陳廷南知有兄而不知有身真不愧爲逸菴之弟馮處夔恩德及於鄉閭仁人有後信夫柴仲和能不失其身以事其親者夫子曰宗族稱孝可謂士焉兩楊子者其庶幾乎乃天均厄以年亦獨何也若介軒之於庭南綸卿之於處夔又芝蘭之生庭除者矣

葉琰字文甫邑諸生性好義讀書每至忠孝節烈事則感慨流涕居仙巖嘉靖甲子別駕胡濟世建宋

文信公祠於仙巖洞文甫捐先世所業田園助之平日慕方正學爲人嘗輯其遺文撫其逸事家狀以傳世先是方氏被鈔時有金陵魏尚書澤謫爲甯海典史匿先生九歲幼子德宗知松江府華亭有先生洪武癸酉科典試江南所得士任勉俞允二人遂密脩書將德宗托邑庠生余學夔逃匿海島中彌月從華亭青村所上岸投俞收育之遂冒姓俞氏任勉知之亦以金饋遺閱十四年俞以女妻德宗改姓余生三子友直友諒友竹友直生二

子長從仁從仁生孟愷孟愷生二子次璣璣生廣
廣係松江府歲貢生三子長采上海縣庠歲貢任
南昌訓導次塾太學生任海甯丞其友諒友竹俱
有後子孫繁衍約二百餘人散居華亭之白沙鄉
金滙塘等處時嘉靖四十年也文甫訪先生遺裔
在華亭乙丑歲貢過南都乃悉叙魏澤當年匿孤
始末爲記甚詳名爲振發幽奇錄又有復姓諱忌
解反覆論之遣人致書於余采余塾勸其歸里守
先生祠於是南中人人知先生有後矣太倉王世

貞題其記後云建文末天下之名能夠義者莫如
方先生其得禍之烈亦無如方先生先生歿三十
餘年而天下乃敢舉其名又五十年而天下乃敢
誦其言又一百四十年而天下乃有求其已絕之
裔而爲之記者嗚呼先生方駕駱澤驂殉故主而
賓於帝所其正氣拂鬱宇宙間卽其後之存與否
無足爲先生重輕第以一時萬乘之尊挾不世之
怒而有不能盡快其意於所不及者亦可想也葉
君爲先生纂述遺事合得及事先生庶幾哉趙朔

李固之客卽千古奚讓焉世貞弟世懋亦有題至
萬歷三十七年仁和楊廷筠督學南畿將先生嫡
裔余姓在雲間者悉改姓方捐貲建造求忠祠以
友直冢枝顯節守祠以友諒冢枝道行守南京雨
花臺祠以友竹親枝樹節守甯海祠俱給衣巾分
入各郡邑學皆文甫啟之也雨花臺祠久圯

國朝邑人洪若臯捐貲重建仍以道行之親枝守焉
贊曰十族同賈一枝潛萌造物巧於設施人情
樂有忠裔吾學編所載已知先生有後而謂在

圍城中托孤于友人余氏若伍員之托王孫于
鮑氏者迨文甫記與書出而先生之心事愈白
而嬰曰諸公之高義並不朽于天壤也文甫之
功豈不偉哉若樹節歸甯而方族先年遣戍獲
歸者已守先生祀反誣華亭爲冒宗訐訟連年
斯其賊義之尤者乎

皇清葉維藩字价叔號翰生爲人惇倫好善冲懷雅
度與人謙退所遇無少長必稱名行必讓路性嗜
學喜誘掖後進閭里有善讀書子弟愛之不啻如

拱璧幼與同里大參周頌爲中外兄弟同鉛槧刻
苦自勵常手註孝經小學二書有裨實踐父元鏞
官楚府典膳念定省遠隔躡屣走二千里啟楚王
假歸王感其孝思許之扶持還里盡滌灑之歡晚
年長公臣遇齠齡才譽籍甚歲設家塾延名師招
致才流同筆硯三殮供餼甚厚傾其橐不計嘗欲
建方正學先生祠未遂贊志而歿以子臣遇貴累
贈奉直大夫湖廣彬州知州孫天士任廬州別駕
陳球字君命號一鳴恭愍公六世孫爲人醇謹敦倫

睦於性至孝幼失恃朝夕哀慕逢忌辰齋三日如
哭初喪爲諸生攻帖括年踰強仕猶鍵戶山房誦
聲琅琅不夜分不休篤緇衣之好雞壇社集每至
綢繆達旦晚應明經之選自奉甚儉粗衣糲食至
施與傾囊不計嘗學范文正公立義田建義莊積
穀以濟貧乏先族黨後戚友人人望賑順治丙申
歲祲道殣相籍煮粥以賑窮人全活甚衆生平克
已檢身爲善而不使人知有鄉民朱朝采貧鬻妻
券已就奪其券焚之給以貲全其夫婦毛應智年

邁易其子於他方爲贖回然皆終身未嘗與人言
而其人自言之如此子恕國學生以至孝聞

陳明瑄字君儒號念茲球之弟爲諸生介性清標壁
立萬仞好與人尚論千古談及忠臣義士則意氣
激昂揚眉抵掌至言近今不平事則目瞪口噤填
胸薄喉半晌不出聲耽嗜書史朝夕科頭跣足坐
臥一小齋剴心鉅腎研窮聖賢義蘊嘗作五經注
疏沿流討源深造自得經歷春秋螢乾蠹老手自
鈔膽蠟頭蠶書墨漬煤九篇帙積盈筐篋終未得

付剖剗沾潤海內國初時文猶襲明弊僻麗剽竊
剪帛花畫死水無濟性靈公深探洙泗濂洛之源
刊落時英典型先民以易學者耳目凡有經其指
引者無不歸於有成晚年兵火之餘衣帔綻裂兒
女啼饑積雪拒門炊烟斷絕以窮困而終所著餘
書散佚無有傳者

張之藩字則价號敬寰天資純厚喜行善事周恤宗
黨自奉甚儉衣粗食糲然不吝於解推凡焚券裂
債助婚助葬皆歡喜爲之非出於勉然者歲饑梓

里人艱食發粟賑濟誦聲載道一生醇謹自好與物無迕人皆欽爲長者當道舉鄉飲賓一再往卽辭不就曰余豈敢以山木田冠數數煩公庭酬酢耶年八十有六終于家子孫繁衍多能讀書

贊曰葉翰生謙恭和厚著德充之符易曰天道虧盈而益謙甚矣謙之不可少也陳一鳴昆弟一孝義可稱一儒行足述一門二難賢矣哉張敬寰一生醇謹閭史無過書市兒無反鬪亦鄉閭之不可多得者乎

隱逸傳

漢高察隱天台山築室讀書士人慕之名其山爲察嶺今佛隴之北其書堂遺址尚存

閻邱逸民失其名居於百步溪側終日坐臥一室陶然自得今地名閻邱

贊曰孔子序隱者自避世以下而皆稱爲賢誠知用世不易哉尚子平讀易損益卦喟然嘆曰吾已知富不如貧貴不如賤但未知死何如生爾烹肌灼手冷水一澆豈皮相之所得測也察

嶺間邱其禽慶之五嶽乎

晉李廡字宗子江夏人少隨兄式渡江式遷臨海太守卒於官廡遂家台爲臨海人有瘧疾不能行坐嘗居兄墓下仰臥彈琴誦讀不輟善草隸河間王辟太尉掾辭不就旣而司徒王導辟爲府掾廡得賤命笑曰茂宏乃復以一爵加人永和時卒廡嘗爲二府辟故號爲李公府其祖康秦州刺史父重平陽太守世有名望稱江夏世家

褚世標義熙中隱士入山不出屢辟皆辭

吳超歷官國子祭酒後避地東甌

任旭字次龍善立操清高不染流俗郡將蔣秀請爲功曹嘗以秀不奉法苦諫不納遂謝去秀後坐事被收歎曰任功曹真人也歷惠元明三帝俱召不起咸和三年卒子琚位大宗正

贊曰任次龍雖少試功曹終非厥志是以言不用則投簪而行時與意違則三徵不起庶幾有晉處士之風焉宗子蚤見危機伯仁有媿矣

宋潘思孟字幾道與陳伯模爲友以道義自高鄉人

多師之治平熙提刑羅適行部造其門命僕扶之
納四拜家有杲亭提刑爲賦詩云行盡城西路爲
君登杲亭無雲生碧落看日出東溟逐影成何事
負暄全我形交情長在目隔岸數峰青其見重如
此孫大年宣和和三年進士

王應之字仲言力學工詩隱居不仕少時開封尹曾
覲欲見之不可得而深爲李燾所愛重仲言嘗作
淳熙聖德十二頌時推爲第一後以子夢龍貴贈
通直郎

王象祖字德父仲言之子有異質學於葉水心而與
陳箕窗爲友和厚嚴重學邃行高守令欲見不可
得真文忠公極重之嘗寄書於文忠公謂救時當
法孔子不止法孟子其卓行類如此時論比之蘇
明允龐德公云

王復字子勉師事葉子儀諸葛希仁二公皆其父次
卿高弟也杜清獻公丞義烏因介之拜毅齊徐公
自是從遊其門及清獻升政府招之不出嘗曰子
勉性情與吾相似此友豈多得哉王實翁亦素善

子勉及爲郡每事多所咨訪子勉嘗捐緡修築新
亭二陟門製緯板時其啟閉田賴以饒洽每歲冬
春之交出穀減價以濟名曰潤糴又積潤糴之穀
以恤鄰實翁嘉之給沒官田若干畝以助後值明
堂恩子應午隨衆爲乞初品服子勉曰布衣吾分
也勿累我卽死以深衣殮足矣其高潔如此
項璣字仁卿居山闢室讀書自樂當孝宗時王卿月
薦之三徵不起隱處教授以終卒之時門人合葬
被青紫者四十餘人學者尊爲松窗先生

贊曰觀羅提刑之推重可以知幾道之賢觀曾
開封不得見可以知仲言之介而名亭以果納
忠以頌夫豈忘君者耶德父效若考勵清修克
光潛德子勉戒厥子勿乞品服卓有定守而瀆
死憂時殫心利物夫豈忘世者耶項仁卿當南
渡之初三徵不起而門多顯士澤以人施庶幾
乎四君子之儔焉是故有貞特不回之操有與
物同體之心而後可以語隱者之成德歟

元柯醜字仁甫性敦厚宋末中神童科卒業太學仕

甯海教諭入元隱居東谷建鑑溪書院延名師以
教鄉人子弟人高其義

金遵古字德卿大府寺丞起炎之子端重好學宋時
試中官闈翻然居五峰山下無復仕進意因自號
青峰山翁與陳樵同爲忘年交雖踰大耋而耳目
聰明爲時尊禮

陳宗儒字宏道號樵同獻肅公從子至元間隱居不
仕平生尚節槩伯父檢院公與以田力辭不受吳
丞相堅延爲上客宏道每說之曰道不行志不遂

尙復何待吳不省遂拂袖南歸竟與之絕所著有
經傳雜志

余容光志尙超卓三徵不起卒贈紫芝處士達兼善
陳剛中俱爲之贊

楊壽字景曦博涉經史絕世故徜徉山水間與陳剛
中交好甚篤所著有五雲集

陳潤字澤民號勉齋至元間以德行聞于時集賢院
錫褒高明處士善吟咏其臥病述懷三章爲時傳
誦

陳樞字師聖號訥齋潤之子通經史敦行孝悌教諸
子以義方同門士多登顯要勸之仕終不應至正
庚寅方氏兵起達兼善受命治師聘師聖賓客咨
畫多所裨益達死于難師聖顙天慟哭曰吾安得
從公地下乎吾不忍見斯世之若是也竟憤懣以
沒士夫高其義以爲有魯仲連之風焉子煒飽學
不仕劔館授徒工于詩

蔣大德名不傳大德其字也當元末方氏據有浙東
三郡起大德于其廬大德厚遇使者令善爲已辭

且曰否者吾惟有死而已旣而私謂其友曰此輩
欲污我我平治時尚不欲仕况仕於此輩乎爾第
觀之事在吾目中矣未幾方氏果敗鄉嘗旱民欲
流散四方大德止之曰吾尚有粟可以相周粟盡
而去未晚也遂擇能者董其事民賴以全明年又
旱復發其所餘弟子告已用將不給大德曰夫民
三日不食則死衆皆死而已獨生尚何心哉弟子
不復敢言

項可立少穎悟好學通羣經大義晦迹不仕一時名

公碩士若金華王文獻輩多與之遊

王彥字汝翼子勉之曾孫也平生為善不求名務德不眩俗孝友義讓著于鄉閭或勸之仕若不聞告以善惟恐失享年八十而卒妻羅能以餘資賑隣里子純誠以篤孝稱二婦早孀相勉守節人謂汝翼力善之效

林處恭性行醇篤受業于舒閩風隱居教授從之者

眾所著有四書指掌圖

按閩風宋寶祐四年進上至元末已百十餘年林受

學于舒則為元人可知矣赤城志誤作明隱士

贊曰夫子有言天地閉賢人隱當元之世可謂時之閉矣宜乎隱君子之多是也撫其操修樹立未必盡同而亢身自潔一而已矣苟蹈耻辱不以藜藿易膏粱此一時皆然然則當時逃名山谷之士安知不有逸于簡冊之外者耶

明蔣誼字廷制號壺隱郎中箴之父自幼與趙孝先

張廷璧相友善以學行重于時永樂初薦至京力

辭而歸棲遲西山朝耕夜讀因復號遺安

陳甯富字好禮號用拙南齋德良之孫也性孝友勤

於問學南齋甚愛之每出入相隨好禮能順適其
意及長受業于趙靖軒學日加益尤長于詩不樂
事進取與其友胡應瑞輩結詩社自娛熏迪族姻
子弟多有成立鄉隣有爭論之而自止友死不能
葬倡義襄其事永平守李從吉薦于朝徵檄屢至
力辭不赴卒之前數日爲詩三十餘篇以別親友
迄屬纊不亂

胡玲字應瑞號松菴又號倥侗子隱居不仕與陳用
拙竝有時名感時觸事必於詩發之趙太僕孝禮

薦于朝命始下以疾卒鄉人惜之

虞橋號存桂居烏巖力學清脩不慕榮利澹然有古

君子之風景泰間藩司有曹大參者聞其賢躬詣
其廬折節下之聘爲弟子師敦嚴有禮曹欲以杭
郡文學薦存桂以母老力辭而歸縉紳咸重之

趙璧字尙全號夢鶴早年涉躡經史慕古逸民之風
遂與高南郭爲友以道義文辭相淬礪名重縉紳
宏治改元徵巖穴才德士郡守葉贄力爲薦謝方
石鐸復爲詩贊之終不應酣歌鼓琴悠然自適後

以子淵貴封行人司正平生易直有容接人和氣
盎然雖僮僕不聞叱詈昆弟三人皆望八望九康
樂熙熙鄉人慕之一日疾革書作好人三字遺諸
子惺然而逝所著有鶴堂稿十卷

高統字士潔號南郭隱于小固山復號固山樵者祖
恩號牧菴嘗舉才德弗應而與陳用拙胡控侗輩
十有八人結詩社自娛一時高之呼爲十八學士
南郭承家學敦古道澹然無希世心嘗自詠云天
應許我飽藜藿夢亦無心上廟廊宏治改元郡守

葉贊欲舉以應詔辭不就郡守陳相請副謝方石
脩郡乘督學徐蕃劉瑞聞其賢躬禮其廬平生面
折人過而與善如弗及閔人窮困而一簞一褐樂
之終身年六十九而卒郡守顧璘立石表其墓所
著有文公台廡錄義靈稗編赤城人物志晤後錄
南郭子及詩文若干卷今祀鄉賢

皇清葉崇震字孺雷文誥郡庠名宿專門毛鄭之詩
教授諸生從游甚衆性好酒日飲盡一石飲後說
經聲鏗鏗然孺雷生而羸弱體不勝衣至性沉塞

喜怒莫見其際家貧衡門兩版讀書穿壁引光爲
文章絕去翰墨畦徑見知於司理金壇蔣楚珍引
與長公太史超晰微訂與司理遷去甲申乙酉之
際士躋褐趨時飛騰踴躍惟恐失後孺雷廢退里
居扃戶山房夜央燈炮一蒼頭供春炊提三寸管
縱評歷昌啟禎間天時人事之故人爲一傳傳爲
一贊剛腸熱血沾濡楮毫旣而兵火相尋一椽莫
棲雙親旣沒負土爲墳創鉅痛深竟以抑沒所著
書散佚不傳

贊曰易之九五嘉遯貞吉上九肥遯無不利吾
邑有明諸君際亨盛之時葆貞全素忽然於功
名富貴之外非所稱嘉正志而肥無所疑者乎
葉孺雷當滄桑麥雨之秋繞樹無枝憂傷激越
颯颯乎有元裕之謝臯羽之遺聲焉可悲也

臨海縣志卷之九終

臨海縣志卷九

其辭言會歲麥雨之候
 各言費之於非河海
 邑古史籍錄字盡之
 贊曰易之六五嘉應貞吉
 上六顯濟無不厥孚

